



أكرم صابري

مصر  
من  
الشبكات  
تأليف  
أكرم صبري

الطبعة الاولى

إبريل ٢٠٠٩

دار جمالات للنشر والتوزيع

الاسكندرية

### كلمة على السريع

كلنا بنحب البلد دي .. بلدنا مصر .. ومصر موش أرض ومباني وبس .. مصر هي شعبها وناسها الطيبون ... كلنا عاملين ننتقد مصر وكأننا بنتكلم عن شعب تاني غيرنا ودولة تانية غير دولتنا .. وكأننا احنا كمان موش مسئولين عن الاوضاع اللي موش عاجبانا .. كل واحد فينا باصص من فوووووق وكأنه غير مسئول عن اللي بيحصل .. وعلى رأى خالد صفوان فى فيلم الكرنك ( كلنا مجرمين ) .. كلنا قصرنا فى حق البلد الطيب دي .. فى هذا الكتاب نلقى الضوء على سلبياتنا وعلى سلوكنا .. وتقريبا كده إحنا الشعب الوحيد من دون شعوب الارض اللي بيحب ينقد نفسه ويتريق على نفسه .. وده شىء جميل لو كان النقد ده حيديك شلوط، للأمام .. أما إذا كان النقد ده يهبط من روحك المعنوية يبأه بلاش ونردد مع عم سمعه ( إسماعيل يس ) ثلاثيته الرائعة ( عال .. عال .. عال ) ، لكن فى الحالة دي لو قعدنا نقول ( جزر ) للصبح ولا حد حيغتنا حتى لو جبنا سوق الخضار كله .. يبأه لازم ننتقد -كعادتنا احنا المصريين - وده اللي بيسموه ( جلد الذات ) .. ولما نحب نجلد نفسنا كمصريين يعنى موش محتاجين كرابيج .. احنا بس محتاجين نبص حوالينا وفينا .. نرصد الجوانب السلبية اللي سطبت نفسها جوانا واللى كمان اتولدنا لاقيناها موجودة فى المجتمع واللى عمله رصد بسيط لسلبيات أنا شايفها ليس إلا .. وطبعاً اللي بيكلمكم موش واحد من ( هنولولو ) هو واحد برضه مصري ..

أكرم صبري



- ٨- الطالب في مصر موش يذاكر غير لما يسقط أو يشله مادة لو كان في كلية تماما زى نادي الزمالك اللي مش بيتحرك غير لما يجي فيه جون .
- ٩- إنتشرت مؤخرا قضايا التحرش زى اللي حصلت في وسط البلد وفي شارع جامعة الدول العربية ، تماما زى ما مرتضى منصور بيتحرش بنادي الزمالك .
- ١٠- هناك بعض الكتابات السياسية اللي بتقول إن الرجل الاول ( عبد الناصر ) خلص على الرجل الثاني ( عبد الحكيم عامر ) تماما زى ما بعض الكتابات الرياضية بتقول إن النادي الاول ( الاهلي ) سبب أزمة النادي الثاني ( الزمالك ) وخلص عليه تماما.
- ١١- الشعب المصري زمان كان بيتفرج على برنامج ( سر الأرض ) موش علشان فيه معلومات زراعية ولكن علشان يشوفوا ( القرموطي ) اللي كان لسه ظاهر وقتها ، تماما مثل مشاهدة مباريات الزمالك موش علشان نتفرج على الأداء ولكن علشان نشوف خناقات اللعبة على مين اللي حيشوط ضربة الجزاء .



وزمان حصلت الفضيحة اللى نشرتها جريدة النبأ وهى صور فاضحة لقسيس مع راهبة وبسببها اتقلت الجريدة فترة من الزمن واتلم الجرنال من الشوارع .. وهنا إستبشر الشباب المثقف خيرا وقالوا بدأت بصور ونحن فى انتظار السى دي .. ولأن الايد البطالة لا مؤاخذه موش تمام بدأ الكفاح من الشباب المثقف لمعرفة هل نزل السى دى ولا لا .. ورغم حالة الغيوم اللى كانت موجودة حول الموضوع ده إلا ان السى دى ظهر ، وهنا رقص الشباب المثقف من الفرح هاتفا ( ما ضاع سى دى وراء مطالب ) . وهكذا يا جماعة مراحل من الشتات والضياح عاشها الشباب المصري والعربي كمان ، ولو اتكلمنا عن الخليج وشبابه لحسيت ان الشباب المصري فى نعيم (من ناحية انه اقل انحرافا يعنى) ، فرغم الكبت الظاهر فى دول الخليج إلا ان اللى بيحصل فى الخفاء بلاوي مسيحة ، فمجتمع الخليج هو فى الاصل منقسم لجزئين ، الاول المجتمع الظاهر قدام الناس والتانى هو مجتمع الغرف المغلقة .. وما ادراك ما الغرف المغلقة ! .. ونظرا لاننا موش عايزين نسيب بلوتنا ونمسك فى بلوة غيرنا حنرجع مرجوعنا ونقول إن الشباب المصري ملاقاش أى حد يحس بيه من كافة المؤسسات .. وأقولك بصدق ان الازهر كمؤسسة دينية عريقة قصرت فى حق الشباب ولم تقربهم ولم تحتويهم إطلاقا .. علشان كده مع ظاهرة الدعاة الجدد لاقيت الشباب بيلتفوا حولهم .. لان الدعاة الشباب دول قدروا انهم ينزلوا لتفكير الشباب ويحاولوا يتكلموا فى مشاكلهم بدون خجل .. وده فعلا فهم مستنير إننا نطبق الدين على الواقع ونتكلم فى مشاكل الواقع من منظور ديني .. علشان محدش يجيبى يقولك حنتكلم فى الجنس ويفتحها على البحري وتبأه المسألة أباحة فى الكلام .. موش ده مقصدى أنا قصدى اننا نعالج القضايا دى من منظور الدين بأسلوب عصري وواقعي مع تقديم حلول للى بيحصل .. وده هو اللى طبقه الرسول عليه الصلاة والسلام لما قال فيها معناه اللى موش قادر على الجواز عليه بالصيام ..

وأذكر ان واحد مرة قاللى أنا نفسي ابطل أبص على البنات قولتله يا عم الرسول قال صوم .. قاللى تصدق انى ممكن افسد صيامي علشان أبص .. طبعا هو المنطق بتاعه خربان والحل اللى قاله الرسول عليه الصلاة والسلام هو حل فعال جدا لان أى حد صائم لله لا يمكن ابدا إنه يفسد أجر مشقة الجوع والعطش علشان يبص ... ودى كمان الانسان يحس بيها اكرت لما يصوم النوافل ويلاقى الناس كلها فاطرة وهو بس اللى صايم حيحس بجهد صيامه غالى عليه اوي لأن للاسف ناس كثير بتصوم رمضان عادة .. تانى حاجه الواد ده اصلا مجربش انه يصوم علشان يحكم .. هو فقط خياله صورله كده والشيطان لعب فى دماغه ..

---

الى عايز اقله انه ممكن يباه فيه حوار مع الشباب تنهي ظاهرة الافلام الثقافية وتلاقى الشباب من نفسه شاغل وقته بالمفيد وموش حيفكر انه يفتح موقع اباحي .. والتوبيك ده هو بداية حوار في مسائل مدفونة محدش عايز يتكلم فيها وجايز محدش يرد عليه لكن انا تكفينى القراءة ويمكن انا ترددت في تنزيله في المنتدى... ونشره فقط على مدونتي على الانترنت...وأهو في كل الاحوال التوبيك بين اديك .

## المفتش كرومبو وقول ألو

اهلا ببيكم

النهاردة حصلت حاجه كوميدى خالص

فتحية مزلقان إشتريت ٢ كيلو برتقال أبو صرة علشان عندها شوية برد

ولما وصلت بيهم لباب العمارة إفتكرت إنها نسيت تشتري نص كيلو لبن علشان ولادها

وكان واقف أما باب العمارة على الرصيف الثاني ٣ من شباب الحارة

الأول : (يحيى ريمكس) اللى كان واقف بيسمع فى الام بى سري اغنية ريمكس

الثاني : هو (ميدو الساهر) اللى كان واقف بيبيع بوسترات لكاظم الساهر

والثالث : وهو (سوكا مرشدير) المكاينكي اللى كان بيصلح إحدى العربيات

فسابت (فتحية) كيس البرتقال جنب باب العمارة ورجعت علشان تشتري اللبن

ولما إشتريت اللبن ورجعت ملقتش كيس البرتقال

ولما سألت التلاته إذا كان حد فيهم شاف كيس البرتقال بتاع فتحية قالوا ..

يحيى ريمكس : أف .. بجد حاجه موش ممكن كيس برتقال ايه وبتاع ايه .. يعنى ينفع كده تخرجني من

المود بتاع الاغنية .. بجد حاجه لا تطاق .. ال برتقال ال .

ميدو الساهر : هع هع .. برتقال ايه اللى انت جاي تقولى عليه وواجع دماغنا علشان شوية ٢ كيلو برتقال

أبو صرة .. لو لاقيته هات واحدة .. هع هع .

سوكا مرشدير : لا انا مشفتش اى أكياس برتقال خالص انا واقف بشرب العصير حتى لسه مخلصتهوش

.. تاخذ شوية .

فتحية

معرفتش مين اللى سرق كيس البرتقال

بس أنا عرفت

لو انت كمان عرفت

اتصل على الرقم ده

زيرو اربع اصفار صفيرين

وإبقى قابلنى لو كسبت حاجه ..

خلصنا هزار

إيه بأه رأيكم في حكاية (اتصل الان) ويمكن تكسب موش عارف ايه والدقيقة بجنيه ونص من اى موبايل ورقصنى على واحدة ونص لو جنابك كسبت ، وفي شكل جديد وإستيل حلو وإعلان لذيد زى إعلانات المفتش (كرومبو) الى عملنا نموذج منها طريقة جديدة ومبتكرة لتشطيب جيوب سعادتك من رصيدك ، يمكن فكرة الاتصال موش جديدة لكن فكرة الاعلان جديدة مما دفع كثير من السذج للإتصال ظنا منهم انهم عباقرة خلاص ووصلوا إلى الجاني وهو نفسه لا يدري انه حياخد على - لامؤاخذه - قفاه وعلشان العملية تباه محبوكة يقولك مع بداية كل حلقة جديدة الفائز في الحلقة اللي فاتت فلان الفلاني من المنطقة الفلانية ولا انت عارف اصلا إذا كان الكلام ده حقيقى ولا لا .. هو موش جايز ميكنش اصلا فيه حد ييفوز بحاجه وكله بس سحب من رصيد جنابك .. طب على فرض وخلينا ناس زى الفل نيتهم بيضاء زى فائلة الزمالك وفرضنا إن واحد فاز طب الاختيار ده بيتم على أساس ايه أو زى العالم اللي بتطلع في التليفزيون ما بيقولوا (أليات الاختيار) ..

يعنى هم مثلا يقعدوا اسبوع يلما في مكالمات وفي الاخر ياخدوا أى نمرة وخلصا بدون اى أليات للأختيار .. أيوه المفتش كرمبو لذيد وبن حلال واعلان اشطه وانا بحبه لكن معنديش استعداد اخسر أى قرش في عملية انها واثق ١٠٠% إنها في الهوا شاشى

هى المشكلة اللعب على حته الاحتياج عند الناس الغلابة ، وعلشان كده تلاقى كثيره اوي برامج اتصل وإكسب زى برنامج من دول على إحدى القنوات نسبنا من العيال الخنافس اللي بتطلع في البرنامج ده ونركز في شوية البنات اللي فيه اللي عاملين فيها مذيعات وواقفين يترقصوا على الاغاني والطبلة ، وواحدة منهم بتطلع بلبس اقل حاجه تتقال عليه انه (فاضح) وفكرة البرنامج يحطلك شوية حروف تختار منها إجابة السؤال اللي هما بيحطوه وشوف السؤال الروعة ده (حاجه في أوضه النوم؟؟) والناس تتصل اللي يقول مخدة واللى يقول مرتبه واللى يقول دولاب وتقريبا ألوف المكالمات فصصت كل حته في اوضه النوم ومسبتش اى حاجه وطبعا كلها إجابات غلط لتأتي الاجابة بعد ساعتين او اكثر من البرنامج وهى (الرسيفر) مع ان اساسا مفيش علاقة بين الرسيفر وأوضه النوم وموش شرط ونادرا ما بيتحط فيها ولا هو يعتبر قطعة من اوضه النوم لكن العملية كلها استغلال للمتفرج اللي طمع انه يكسب اوضه نوم لو جاوب صح ، والعيب موش في القنوات دي ولا في البرامج دي لكن العيب في اللي بيمسك موبيله ويقول (الووووووو ممكن اشترك معاكم) . ومتنسوش تقولولى مين اللي اخد البرتقال .

## إزاي تعرف إن اللي قدامك ده يهودي ..!!

- ١- لو لاقيت إن اللي قدامك ده ( إيجة) و( جلدة) يبأه أكيد ده يهودي أو على أقل تقدير متأثر بهم ، فنظرية البخل اللي اخترعها بلاشك يهودي بن يهودي .
- ٢- لو ذكرت كلمة ( هتلر) فلاقت اللي قدامك عمال ينتنط زى الكره الجلد وعمال يصرخ زى الاهبل ( هلو كوست ..هلو كوست) يبأه يهودي مأسل .
- ٣- لو فتحت التليفزيون ولاقت جندي شايل بندقية ومستخبي وراء جدار وخايف من طوبة تجيب أجله هو بلاشك يهودي من ماركة ( يلا بينا نمشي) .
- ٤- لو قلت قدامه ( ٦ اكتوبر) يغمى عليه ، ولو جبت سيرة رقم (٧٣) تجيله أرتيكاريا يبأه ده يهودي آخر حاجه .
- ٥- من الأسماء المحببة إليه إسم ( سامية ) ، ولو عرف انك بتكرهه يبأه انت عدو السامية .
- ٦- تلاقيه ديا من عشاق رحلات (السفاري) نظرا لأنه خبرة قديمة فى التوهه فى الصحراء من ايام أجداده الأوائل .
- ٧- لو قلت قدامه عن المسيح الدجال إنه أعور بيزعل لانه بيفتكر كبتلقح كلام على (موشى ديان)
- ٨- لما بيدبح العجل بيعيط .
- ٩- اللون المفضل عنده دائما هو اللون الصفرة بداية من الابتسامة الصفراء إنتهاء بالليمونة اللي لونها أصفر واللى سيادتك بتعصرها عليه علشان تتعرف تتعامل معاه .
- ١٠- بيعظم أوي يوم السبت لدرجه ان قصته المفضلة ( أصحاب السبت) اللي ربنا مسخهم فيها قرده وخنازير .

## السكة اللي موش مديد

((١))

في عيد الفطر اللي فات وتحديدا في صبحية العيد ، رحنا علشان اركب القطار واذ فجأة لاقيت التذكرة إرتفعت ثمنها بدل ما كانت بـ ٦٥ قرش أصبحت التذكرة بقدره قادر بـ جنيه واحد وأصبحت في نفس ثمن تذكرة المترو اللي موش موجود اساسا عندنا في إسكندرية ، قوت وماله جنيه ميضرش طالما حلاقى القطار على سنجة عشرة ، دخلت القطار لاقيت كل حاجه زى ما هي الكراسي منيلة بنيلة ، واللمبات هبات والضوء بتاعها يجيب عشى ليل ، قوت يا ترى يا هل ترى هم غلوا التذكرة ليه؟! ما الخدمة هباب زى ما هي! واللى زاد وغطى كمان ان القطار إتعمل بينا مرتين مرة ، في (المنذرة) ومرة في (سيدي بشر) وكان لابد وحتما إني أقفز قفزة الثقة من القطار (أصله متعمل بين محطتين) علشان أنزل أركب أى حاجه تانية .. طيب ايه اللي فكرني بالحكاية دي دلوقت؟

أقول لجنايبك ، اصل من قيمة كام يوم طلع رئيس هيئة السكة الحضيض اللي كانت معروفة زمان بإسم الحديد وقال إنه موش حيسمح بتصوير أى فيلم يتعلق بالسكة الحديد إلا بعد عرض السيناريو عليه ويقراه ويوافق كمان علشان لا مؤاخذه سمعة السكة الحديد متبأش في الحضيض ، وبصراحة أنا شخصيا لو كنت قرأت الكلمتين دول في كريكاتير كنت حضحك وموش حصدق انه ممكن يكون حقيقي ، وجايز كمان يطلع علينا نقيب الاطباء انه هو كمان موش حيوافق على تصوير اى فيلم في أى مستشفى غير لما يقرأ السيناريو حرصا على سمعة المستشفيات وموش حنخلص ويسيب بأه الناس دي شغلها ويقضوها قراءة أفلام ومسلسلات ، بس ربك والحق الناس موش محتاجه افلام تتعمل عن السكة الحديد علشان يعرفوا جودة الخدمة عاملة ازاى فإنجازات السكة الحديد تتكلم عن نفسها يا باشا بداية من القطار اللي خرج عن القضيب ونزل للشارع (بتاع كفر الدوار) حتى كانت واحدة بتبيع جرير لاقت القطار معدي من قدامها في وسط الطريق عادي خالص ، وقطار العياط اللي لا مؤاخذه ولع نار بالناس اللي فيه (تطبيقا عمليا لنظرية الاحتماس الحراري) ، يا جماعة إنجازات السكة الحديد بتتكلم عن نفسها ، لا افلام ولا مسرحيات ولا بتاع إنسى يا معلم الواقع بيتكلم يا محترم .

((٢))

كان فيه سؤال محيرني ، ليه لما احجز تذكرة قطار من الشبابك بتكون بـ ٧٥ قرش ولو دفعت جوه القطار بتكون بجنيه واحد (فقط لا غير ، هما كمان عايزين غير!) طلعت الاجابة إن دي غرامة يا محترم لانك راكب من غير تذكرة ولان

المسؤولين عن السكة موش ماشيين بالاية القرآنية (إن بعض الظن اثم) فكل راكب من غير تذكرة يبأه اكيد - من وجهة نظرهم - عايز يركب سفلقه من غير ما يدفع يبأه لازم تدفع غرامة اللي هي ربع جنيه واحد (فقط لا غير .. برضه!) ، مع إن الكومسرى فى القطار معاه تذاكر كثير جدا وبيتجه لواحد واحد من الركاب علشان يدفع وكأن الطبيعي ان الكل موش دافع على الشباك ، اللي عرفته جديد ان المحصلين بياخدوا نسبة على الغرامات دي حوالى ٧٥% من المرتب يعنى مصائب قوم عن قوم فوائد ، طب بالعند فيهم بأه انا قولت حدف كل مرة من الشباك وفضلت على كده فترة لغاية مرة نويت اركب من سيدى بشر لكن للاسف ملاقتش شباك ادفع فيه ، وإفتكرت ان محطة سيدى بشر عمرى ما شفلتها شباك تذاكر نقطع فيه مع ان مكان الشباك موجود ، وغلبت افهم الكومسرى المحترم أن اصلا مفيش شباك علشان يطبق عليها الغرامة لكن تقول ايه بأه موش قتلتم دى السكة الى موش حديد .

## إفتح هويس السلام النفسي وفش بمدرى بس أوعى لتأفد برد

أحد الفلاسفة اللى دماغهم متكلفة شوية بيقولك ايه

بيقولك إن الانسان - اى إنسان - عنده شمسان ، شمس بتشرق عليه كل يوم الصبح وشمس تانية بتشرق جواه ، تصدقوا بجذ الفيسوف ده عنده حق ،

ان كل واحد فينا عنده شمس داخلية جوه نفسه ، يعنى حاجه كده جوه نفسه تخليه يشوف الدنيا ربيع والجو بديع فى اسود ، احلك اللحظات ، والاهم من ده كله إنها بتخليه قادر على الاستمرار فى الحياة ، وخلونى أقولكم انى شفت إنسان عنده أكثر من ٧٠ سنة وينزل الصبح بدري علشان يفتح الدكان ( المحل ) بتاعه بكل همه ونشاط وهو مبسوط رغم انه موش محتاج للدخل اللى حيجبهوله المحل ، ولما قولتله انه ليه بيتعب نفسه وانه فى سن دلوقت محتاج فيها انه يتمتع بالحياة بدون اى هموم ، قاللى انه موش بيشتغل علشان محتاج فلوس لكن هو بيشتغل علشان يحس انه لسه عايش وإنه هو موش حاسس ان دوره فى الحياة انتهى ،

هو ده يا جماعة اللى أنا بتكلم عليه شمس الانسان الداخلية اللى ديبا محسساها ان فيه يوم جديد بانتظاره ، وده هو سبب انطلاق الانسان مبدعا فى الحياة ، وانا اعتقد ان لو إنسان فقد شمسها الداخلية دي موش حيبأه فيه حافز ان الانسان يشتغل او يجتهد او انه يعمل اى حاجه ،

بالعكس ممكن يفقد الرغبة كمان فى الحياة ، يعنى لما إستيقظ العالم كله على انتحار (مارلين مونرو) عجز العالم كله عن إيجاد سبب لانتحار الممثلة الموزة دي ، فهى كانت تمتلك المال والجمال والشهرة ، و(فان جوخ) الرسام العالمي الهولندي الشهير انتهت حياته فى احدى المصحات النفسية وبعدها اطلق على نفسه الرصاص وخلع .. طب العالم دى إنتحرت دي .. كان عندها كل حاجه فلوس وشهرة .. أنا أعتقد ان العالم دي مكش عندها الشمس الداخلية اللى حتحسسهم ان حياتهم لها قيمة ، أو إن لسه الحياة محتاجه لهم ، وخصوصا الشخصيات البعيدة عن ربنا - سبحانه وتعالى - يعنى ليه مثلا عندنا حالات الانتحار موش زى اوروبا ، لان الوازع الدينى موجود عندنا ، الوازع الدينى ده هو اللى بيمثل لنا الشمس الداخلية اللى بتخلى الانسان يحسب كل شىء عند ربنا طمعا فى رضاه ، يله إفتح هويس السلام النفسي بداخلك وإفتح شبابيك قلبك خلى نور شمسك الداخلية تدخل تنور كل جسمك بس خلى بالك أحسن تاخذ برد





## مأساة ملق شنب على موسى ملاقة

أغنية ثلاثي أضواء المسرح

بص شوف مين يا وعدي

كان فيه كويليه يقول (شباته في بقة وسنانه زى الحلزون الواحد يقدر يلاعبهم ويدخل جون)..  
فزمان ويمكن لحد فترة قريبة كان فيه تعظيم هائل جدا للشنب إلى أن حدثت له إنتكاسة معتبرة مع  
صحوة مواس الخلاقة وإطلع يا لورد..

ومتعرفش ليه أساسا زمان كانوا بيعظموا جدا من شأن الشنب حتى أنه بات من معالم الرجولة يعني  
الراجل علشان يباه راجل لازم يكون شنبه عرضه لا يقل عن مترين ..ويمكن الاحساس من تعظيم  
الشنب ده مكنش بس عند الرجاله ، فبرضه زمان كان كثير من الستات اللى بتبحث عن معالم الرجولة  
والفتوة في شريك حياتها كان لازم يكون بشنب ..

حتى الستات من بتوع جمعية حقوق المرأة المسلوقة تحت وطأة شنب الراجل كانوا بيطلعوا غيظهم في  
الرجالة عن طريق بعض الكاريكاتير المضحك اللى فيه الست بتكسر سنن الراجل وبتجيبه نصين ، وبدل  
ما يكون شعار اى واحدة قادرة ومفترية (أنا لازم اجيب مناخيره الارض) أصبح الشعار ( لازم أجيب  
شنبه الأرض ) .. ومن هنا بدأت المؤامرات تحاك حول الشنب ..

ويا ولداه الرجاله مشيين في الشوارع من غير اى شبات مش لان الستات ولا مؤاخذه قدروا انهم يخلقوا  
شنب الرجاله بس لتغير الزمان وأصبح الواحد بيص للشنب ده من منظور غير جمالي خالص على وجه  
الراجل وبدأت تقليعة الدوجلس كطريقة لتهديب الشنب .. حتى الناس اللى هم أعلنوا الالتزام الديني  
حلقوا شباتهم وربوا دقنهم .. فمبأتش حكاية الشنب دي حكاية ذات اهمية ..وأنا اساسا شايف ان الربط  
بين الشنب والرجولة والسمع والطاعة من جانب الستات أمر غريب شوية .. ونفسي أعرف تحديد امته  
وفين ظهرت حكاية ان الشنب يعنى الرجولة .. مع أن فيه رجالة بشبات يصعبوا على الكافر من العمائل  
اللى بتتعمل فيهم من مراتهم ..

بيأه حتى فرح الستات بتوع حقوق المرأة بإنكسار الشنب على شفرة حلاقة لورد فرح ملهوش أى علاقة  
بين إنكسار الشنب وبين إنكسار شخصية الراجل .. فالراجل بشخصيته لا بشنبه .. فيا كل من حلق شنبه

أرفع رأسك يا أخي فنحن في عصر مواس الحلاقة .. ولتعلم أن الرجل مش بس بكلمته الرجل بمويله  
ورنته.

## معلش يا مبيتي بابا وماما موش موافقين ..!!

كلايت تاني مرة - على طرايبزة في النادي - هو باصص في الارض - وهى مبحلقة فيه )

سلوى : هاااا يا مدحت كلمتهم في موضوعنا

مدحت : كلمتهم بس للاسف مش موافقين

سلوى : وانت قولت ايه ؟

مدحت : مقولتش

سلوى : وناوى على ايه ؟!

مدحت : مش عارف

سلوى : طب لما تعرف تباه تقولى

( وتتركه سلوى وتنصرف غاضبة )

-----قطع-----

لو أنت مكان مدحت تعمل ايه .. ! وهل ده يعتبر ضعف شخصية من مدحت قدام اهله .. وهل من  
الممكن أنك تتجوز واحدة اهلك مش موافقين عليها حتى ولو كان ده ممكن يغضبهم .. والأهم من ده

كله هل أنت شايف ان من حق اهلك انهم يدخلوا في اختيار شريكة حياتك ؟!

طب تعالوا نتكلم واحدة واحدة

دلوقتى مفيش حد يقدر يجبر شاب انه يتجوز واحدة هو مش عاوزها .. وغالبا الشباب اللي بيتحججوا  
بموضوع إن الأهل مش موافقين ملهمش رغبة جادة في إتمام عملية الزواج أو بمعنى اصح عاوز يفلسع  
بطريقة تحفظ له ماء وجهه .. لكن ده ميمنعش أن فيه فعلا شباب مش بيحبوا يتجوزوا دون رغبة أهاليهم  
ومباركتهم للزيجة دي .. وهنا وفي أحوال كثيرة قد يحصل الاختلاف بين وجهات النظر .. بين وجهة نظر  
الأب أو الأم ووجهة نظر الابن .. وما بين الاختلاف بين وجهتين النظر تظهر معها الشعارات فالاب  
والأم يرفعوا شعار (( إديها خبرة .. يعنى إحنا اكثر منك خبرة وتجارب ولازم تسمع الكلام )) ..  
ويرفع الابن شعار (( هو انا اللي حتجوز ولا أنتوا؟! )) .. ويحصل الاصطدام بين وجهات النظر .. ويقع  
الشاب في حيرة بين اهله وبين قلبه.

شوف يا برنس .. القضية دي أولا وأخيرا مفايحها في إيدك إنت .. في كيفية إتخاذ القرار في موضوع خطير زى موضوع الإرتباط .. وتكون محدد لنفسك منهج تفكير سليم ماشى عليه في إختيار شريكة حياتك .. فتكون محدد المواصفات اللي أنت عاوزاها من تكافؤ في كل شىء علمى ونفسى واجتماعى ودينى وكمان شكلى ، والشكل ده مسألة نسبية وبترجعلك إنت .. بعدين تقارن كل المواصفات اللي انت عاوزها وتعملها إسقاط على شريكة حياتك .. وتشوف هى دي ولا مش هي .. لان يا باشا لازم يكون إختيارك ناتج عن العقل والقلب مع بعض .. مينفعش يكون واحد فيهم بس .. بعد كده اسمع لوجهة نظر أهلك والأسباب اللي هم إستندوا عليها في عملية الرفض دي .. وماذا تعنى ( غير مناسبة ) من وجهة نظرهم .. فإذا وجدت ان فتاتك بها كل مواصفات أحلامك اللي انت حددتها بالعقل والقلب .. ووجد ان رأى أهلك فيه نوع من الإعضال وعدم الموضوعية في الرفض إذن يكون رأى أهلك رأى إستشاري فقط .. فزواج الرجل لا يحتاج إلى ولي ولا يشترط الشرع أن يوافق والد أو والده العريس على العروس .. لكن البيت السعيد لا يمكن أن تكتمل فرحته من غير عدم رضا كل الاطراف عن الزيجة دي يا باشا .. علشان كده لازم تتجنب الصدام مع أهلك وخصوصا في البدايات .. لأن ديبا البدايات بتكون فيها المشاعر متوترة والنقاشات بتكون حادة وعصبية نوعا ما .. وحاول أنك تتكلم مع أهلك برفق ولين حتى لا تقع في العقوق المنهى عنه شرعا .. وفي نفس الوقت ابحث عن حد تثق فيه ويكون له تأثير على أهلك وتجعله يكلمهم في موضوعك .. وأخيرا ليس لك إلا الحوار مع اهلك ويكون نفسك طويل فيه حتى تقنعهم .. وتقولهم انك حتتحمل تبعات اختيارك .. لكن يا باشا متنساش حاجات مهمة إنك تتعامل مع وجهات نظر اهلك في العروس بموضوعية وتفكر فيها وان الجواز بغير رضا الأهل لا يُفضل إلا إذا كان رأيهم ظالم وفيه إجحاف، وبعدين حتى لو التجوزت من غير رضا اهلك إياك ثم إياك إنك تقاطعهم حتى ولو هم قاطعوك لأن في الغالب تصرفهم ده سيكون رد فعل مؤقت .

## إلى كل البنات المتمنجات تذكرى قول مدتك فطبوها اتعززت تركوها

### اتذمت

كلنا متفقين تقريبا أن البلد فيها أزمة جواز..  
 وإن شبح العنوسة هو البعيع بتاع البنات الايام دي..  
 فى ظروف زى دى ايه المتوقع من أى أب وبتته جاهلهم عريس كويس وأخلاق وجاهز وفى نفس الوقت  
 البنت أعجبت بيه؟ ..!!  
 المفروض انهم يشيلوه من على الارض شيل..  
 ده اقل ما يجب أن يعملوه..  
 لأن خيلنا نتكلم بصراحة..  
 فرصة الرجل فى الزواج اكبر بكثير من المرأة..  
 الرجل الجاهز ممكن يلاقى أكثر من واحدة مناسبة له..  
 لكن البنت الفرصة الواحدة غالبية جدا بالنسبة لها..  
 لكن المشكلة الايام دي أن فيه أبهات وفيه بنات مش مقدرين الواقع كويس..  
 أو مش فاهمينه..  
 ولما يجلبهم عريس كويس يسلخوه وكانهم بيعاقبوه على إنه فكر انه يتجوز..  
 ويمكن جوازات تقف فى اخرها علشان حاجات تافهه زى مثلا (القائمة) دى اللي بعض اباء البنات  
 بيصمموا انهم يكتبوها على العريس رغم انها لا من الشرع ولا من الدين .. ده الشبكة اللي هى شبكة مش  
 من الشرع وهى عبارة عن هدية يقدمها العريس وحتى لا يجبر عليها .. ده كلام شرعي على فكرة..  
 ويحصل بسبب حاجات زى دى تقف جوازات..  
 وأنا بس عاوز أديلكم أمثلة من الواقع وهى حصلت فعلا علشان تعرف بس انه رغم الظروف الصعبة  
 اللي بنعشها دي مفيش اى تعاون ولا تفكير سليم لا من البنات  
 (( مش كلهم طبعا )) ولا من أبهاتهم..  
المثال الاول : بحبها شوية!!..  
 راح علشان يخطبها وهو شخصية فى مركز اجتماعي كويس وهى اقل منه فى المستوى التعليمي وأقل حتى

في مستوى الجمل .. قعد مع ابوها و جت سيرة الشبكة

قاله والله يا عمي أنا حجب شبكة بـ ٣ آلاف جنيه ، قاله معلش يا بني اختها جالها شبكة بـ ٥ الاف جنيه ومش عاوزها تحس انها اقل من أختها .. قاله مش حينفع يا عمي أنت عارف ان الخطوبة كلها على العريس و حدفع مبلغ جامد وانا لسه بدفع فى أقساط الشقة .. والراجل ابدأ مصمم على رؤية .. فالشاب قاله بدل انت مصمم خليها قاعدة حجب امها .. وسابه ومشى .. بعد يومين اتصل به وقاله خلاص يا بنى بـ ٣ الاف جنيه .. قاله خلاص يا عم الحج (( صبح صبح )) أنا صرفت نظر إذا كان من اولها بتعملوا معايا كده امال بعد كده ايه!! ..

تعليق!!....

يعنى ده مثال واضح لشخص ولا مؤاخذه بيتاجر بينته مش عايز يجوزها ... يعنى إحنا دينا بنقول ان الشبكة دى هدية العريس والمفروض يجب حاجه على أد إمكانياته لكن للاسف تفكير معظم الأسر المصرية ان الشبكة دى وسيلة للتباهي بين بنات العيلة الواحدة ومين جالها شبكة أغلى وهكذا .. وبعدين يا جماعة واقعيا محدش بأه يجب شبكة دلوقت اخرها دبلتين ومحبس والشبكة على الدخلة .. المفروض لو ناس فعلا شاريين راجل فعل مش كلام يسهلوا له أمورهم ويخافوا على فلوسه اللى هى اصلا حتبأه فلوس بنتهم .. لكن احنا دلوقت شايفن الدنيا مولعة ازاي يعنى الشاب كتر خيره الايام دى انه عارف يتقدم علشان يتجوز وهو فى الاساس بيثيل الليلة كلها ولو حسبتها ولا مؤاخذه حتلاقى ابو البت مش بيدفع حاجه تقارن باللى بيدفعه العريس من اول الخطوبة لغاية الدخول ... ده حتى فى تفاهات الامور اللى بيسموها (المواسم) لو العريس محبش هدية يعملوها له قضية! ..

القضية مش مسالة فلوس .. القضية ان ده زواج .. يعنى مودة ورحمة .. فالمفروض الاب فعلا اللى عاوز يستر بنته يسهل الحال مع المتقدم وفى نفس الوقت لا يرخص من بنته ويحفظ لها كرامتها ففيه فرق بين ان الانسان ييسر على غيره وبين ان يتنازل .. انا مش بقول يتنازل ولكن بقول ييسر وهناك فرق! ...

المثال الثاني : مرحش الخليج أنا

تقدم لها .. ودفع لهم كل ما طلبوه .. وتمت الخطوبة .. وقام بتجهيز شقته .. وقبل الزفاف بأسبوع قالها إن شاء الله بعد الجواز بشهر حنساfer للخليج علشان جالى شغل هناك .. وطبعاً يعنى عقد عمل فى الخليج ده حلم لاي حد ومش بالساهل كمان .. قالتله لا أنا مش حنساfer الخليج ومش حسيب مصر لو عاوز تسافر سافر انت وانا حنستاك .. قالها امال انا حتجوز ليه .. وفى الاخر

فشكل الخطوبة وقالها مع السلامة.

تعليق!!..

ربنا لما يعطى إنسان نعمة وهو مش مقدر قيمتها حتغور من وشه..

وده اللى حصل مع البنت دى ان النعمة اللى هى فيها غارت من وشها..

يعنى فى ظل كل الظروف السيئة اللى احنا فيها .. جالها عريس معجبة بيه وجاب شقه وشبكة وجاهز من

كله وفاضل خلاص أسبوع على الزفاف.. وفى الاخر تنتطط عليه علشان حياخدها ويسافر الخليج وكأنه

حياخدها مثلا ويسافر صحراء الربع الخالي .. مع ان الاصول بتقول إن الست تروح مع جوزها اى مكان

، هى دى الاصول .. لكن هى كان فى ايدها نعمة اتتمردت عليها فغارت من وشها..

كلمة اخيرة

النماذج دى مش كل البنات الموجودة فى المجتمع .. فيه لسه بنات واهالى فيهم الخير وفعلا بيثيلوا الراجل

.. لكن انا حبيت اركز على نماذج مستفزة فى المجتمع..





## مبيعرفش يبوس !!

طلع قانون الخلع من ست أو سبع سنين قلنا خلاص فرجت ..  
 والستات خلاص حتحرر من عقدة ( البيت الوقف ) اللي كان ديا الرجاله بتهددهم بيها ..  
 لكن بصينا لاقينا الستات مستخدمة قانون الخلع استخدامات غريبة ..  
 اللي عاوزه تخلع جوزها علشان معفن مش يبستحمى ..  
 واللى عاوزه تخلع جوزها لانها اكتشفت بعد ٢٥ سنة جواز أن دمه مش خفيف ..  
 وحاجات من النوعية ..  
 وأغرب حاجه سمعتها وقرئتها في الجرائد أن واحدة طالبة الخلع أو الطلاق من جوزها .. عارفين ليه!  
 لانه مبيعرفش ..  
 متخليش عقلك يروج بعيد هو زى الفل بشهادة زوجته  
 بس مبيعرفش يبوس ..  
 والست وهى بتحكى قصتها تحس ان والوليه دى قلعت برقع الحياء ، يعنى هيا بتحكى لما راحت بعثة في  
 فرنسا واتعرفت على واحد هناك مصري عايش في البلد دى واللى علمها ازاي يكون ( البوس الفرنسي )  
 اللي هو اصلا اتعلمه من واحدة ادا امه كان عايش معاها ..  
 الحكاية المهيبة دى منشورة في مجلة صباح الخير ..  
 والست يا ولداه لما رجعت مصر واتجوزت إكتشفت ان المحروس جوزها مبيعرفش يبوس ..  
 لا وهى كمان مش عاوزه أى بوس دى عاوزه بوس فرنسى  
 بوس متسورد  
 طيب .. نفترض ان الراجل جوزها ده راجل مستقيم لالف ولا دار .. طيب الخبرة دى حيحبها مين  
 .. وبرده فيه ستات ولاد حلال محترمين حيحبوا الخبرة دى مين ..  
 بصراحة ..  
 الحاجات دى بتيجى بالاستكشاف بين الراجل وزوجته ..  
 ليصلوا إلى الخبرة المطلوبة ..  
 مهو الراجل المنيل اللي كان عايش أقدر حياة مع واحدة فرنسية كان في الاول أبيض يا ورد ، والست إديته  
 كورسات مكثفة ...

لكن هل تعتقد أنت أن مسالة البوس دى ممكن تكون مبرران يتهدم عليها عش زوجية

وبعدين دى مشكلة عويصة وحلها سهل ..

ونبدأ بالعلاج بأغنية حكيم

((حجري عليه وابوسو ..ولو يعمل ايه حبوسو))

يسمعا ٣ مرات يوميا

بعد الفطار والغداء والعشاء

مع الراحة التامة

## الموار الصريح بين مستكة والدكتورة نفوسة النفساوية

صباح المكاشفات اللي هي

بصراحة ومن غير خجل مع الدكتورة

((نفوسة النفساوية))

أستاذة علم النفس بجامعة نداغ اللبان فرع شكلس

كلاكيث أول مرة

مشهد داخلي

((مستكة ممددة على الشيزلونج - نفوسة قاعدة قدامها وتعدل في نضارتها كعب الكوباوية ومشغله

الكاسيت علشان تسجل مع موسيقى كلاسيك))

نفوسة النفساوية : مستكة .. فضفضي ورطططي الكلام اللي عندك من غير حبشتكنات!؟

مستكة : بدأت العلاقة اللي بيننا تاخذ شكل تاني .. أخذت رقم التليفون منه وبقيت باتصل بيه بصفة دائمة. كان يبقي مشغول في أحيان كثير في الكلية، وبالتالي كنت باتصل أنا .. يعني ماكتتش باعمل فرق ..

نفوسة النفساوية : وبعدين يا دلعدي!؟

مستكة : دلوقت بقالنا ٥ شهور .. بس فيه مشكلة .. ساعات كثير باحس إنه زهقان مني، ويبعد عني باستمرار .. بيتحجج بأي حاجة عشان ينهي ميعادنا بدري ومش بيحب يقضي وقته معايا زي الأول .. باتقتل بجد لما باحس إنه مش متحمس لي .. أو مش بيحبنى قد ما أنا باحبه .. مش عارفة إيه اللي حصل!

نفوسة النفساوية : يا رتي ايه سبب البرود في علاقتكم دي!!؟

مستكة : يا دكتور امال انا جياالك ليه!

نفوسة النفساوية : لازم يكون فيه مشاركة وتفاعل .. طب شوفي يا مستكتي لما بتتصلي كثير كده أو بتحاولي التواجد في حياته أكثر من اللازم، بيعس إنك مستعجلة على الارتباط، والارتباط في حد ذاته مش موضوع سهل .. لأنه حاجة بتستمر العمر كله بإذن الله فيخاف إنه يتقدم. بيعس إنك حاسة إنك "لازم" ترتبطي بيه .. للأبد .. للأبد .. للأبد (وده شيء مخيف زي ما إنت واخدة بالك!).

مستكة : تصدقي لقيت نفسي إذ فجأة كده باقول له تعال نشرب حاجة في الكافيتريا؟؟

نفوسة النفساوية : والمشاريب على مين .. احم احم .. قصدى وبعدين!؟



نفوسة النفساوية : اعمممممم معلش اصل البلد حالها مش تمام اضرابات على غلاءات على بلاوى  
سودة تلاقيه بيتابع .. اه اكيد بيتابع .

مستكة : لالا يا دكتورة .. اهى ء اهى ء اهى ء .. ده مبأش يجبنى .. بيتهرب مني .. هو انا كنت غلطانة لما  
تجاوبت معاه لما كان بيصلى ؟

نفوسة النفساوية : اعممممم .. بيتهيلى كده يا مستكتى .. اصل التصرف السليم إن البنت تريح نفسها .  
ولا تحمل نفسها هم إنها تتابعه بعينها، ولا إنها أول ما تحس إنه بيص لها تبادلله النظرات واللهفة .  
والسبب إن تلك الطريقة تجعله يفقد اهتمامه بك

مستكة : لا أزاى يا دكتورة .. ده فى اول علاقتنا كنا بنبص لبعض كتييسيسير وكان مهمم .. لغاية ما اقعدنا  
نتكلم مع بعض وكان جنتل مان معايا على الآخر .. حسيت انى عاوزه اتكلم معاه فى كل حاجه .. بأيت  
بتكلم وهو يسمع .. لغاية ما ريقى نشف

نفوسة النفساوية : ودى غلطة تانية

مستكة : ازاى

نفوسة النفساوية : المفروض إن البنت فى أول لقاء أو كلام بينهم تكون هادئة جداً ولو بتموت فيه .. وكما  
إنها هتمسك لسانها لازم أيضاً تمسك عينيها .. يعني بلاش أو -بصراحة أكثر- عيب إنها تسهم فيه  
وتسبّل . لأنه هياخد باله من نفسه أكثر من اللازم وهيحس إنك محاصراه وضيقته عليه الخناق باهتمامك .  
وبالتالي، يعمل حاجة من اثنين إما إنه هيزهق وهيمل منك أو يخاف ويكش منك بسبب جرائك .. وفى  
كلا الحالتين سيهرب .

مستكة : أمال أعمل إيه، كنت أتكلم فى السياسة والفن والحياة العامة؟

نفوسة النفساوية : لأ .. ببساطة افتحي له الطريق وسببيه يتكلم .. وفتح الطريق هيوصل له لما يلاقيك  
مهمة بمن حولك ومركزة فى لا شيء .. يعني عينك مش جوه عينه .. لأ .. وزعي نظراتك على كل  
المكان .. حتى لو ماكانش فيه ناس كثير، اتفرجي على الحيطان، بصي لتحت ووزعي نظراتك على اللي  
حواليه فى الهوا .

مستكة : كده حيقول عليا مجنونة!!!!

نفوية النفساوية : وهو المطلوب .. هو اصلا فيه حد عاقل بيحب الايام دى

مستكة : طب هو ضارها طناش دلوقت اعمل ايه ؟





---

مستكة : أنا ممنونة ليكي جدا

نفوسة النفساوية : وأنا اتمنى ليكي حياة سعيدة

مستكة : دكتورة نفوسة .. مش عارفه أشكرك ازاي! ..

نفوسة النفساوية : اند تدفعى حساب الجارسون اللى جاى علينا ده

## يوميات واهد مدفوس فى أتوبيس الاضطراب الجنسي التمككي !!..

فى إجتماع مجلس الاخوة المهيسين الأسبوعي على قهوتنا المفضلة سألني أحد الجهابذة وهو يشد الشيشة بعمق (تفتكر ليه كترت أوعي حكايات التحرش الجنسي فى الايام الاخيرة!) فرددت عليه بسؤال (مين بيتحرش بمين؟! ) (قاللى بيتحرشوا بالبناات يا باشا) .. قولتلهم يا جدعان على فكرة رجاله أوستات بيتم التحرش بيهم وكل واحد يخلى باله من نفسه بأه .. ومع علامات الازهلال الطله من العيون هرش احد المهيسين فى رأسه وقالى هم الرجاله حد بيتحرش بيهم؟! .. فحكيتلهم حكاية أتوبيس الغبرة اللى بيلف اسكندرية كلها وهو أتوبيس غريب وعجيب بيتكون من ٣ أرقام وهو أتوبيس ١٤٥

أخذت الأتوبيس فاضي من المنتزة على أمل إنى أوصل الشاطبي ديركت عن طريق البحر فى كتيره نص ساعة .. لاقيت أتوبيس الهنا عمال يدخل فى زوارق وشوارع جانبية ويلف مع نفسه على طريقة ودنك مينين يا جحا وبعدين فىن وفىن لما خرج على الكورنيش من شارع ٤٥ .. بس ما شاء الله خرج على الكورنيش بعد لما أصبح عليه سردين .. والحمد لله انى كنت قاعد فى أول كرسي بعيد عن اللبس .. وخير اللهم اجعله خير واحنا قاعدين وربنا كافينا شر الركاب الواقفين إذ فجأة نسمع صوت أنثوي ناعم بيصرخ وبيقول (يا قليل الادب) .. وطرفه كده تشبه صوت حد خد على قفاه لكن الحمد لله طلع على خده بس .. وهرج ومرج فى الاتوبيس و(فيه إيه يا جماعه) طلع أن فيه واحد تحرش بواحدة وعمل حاجات مش ولا بد فى الزحمة .. الركاب اتوصوا بيه كام قلم على كام قفا ونزلوه من الاتوبيس ..

وما بين إستعجابي وإستعجاب الرجل اللى كان قاعد جمبي وأثناء تحليلنا أنا وهو لسلوك المتحرش فى وسيلة لمضيعة وقت الطريق إذ بنا نسمع صوت على لتاني مرة يصرخ (يا ولاد الـ...) بس الغريب ان الصوت ده كان رجالي ويظهر ان اخدله نصيبه هو كمان .. والرجل هاج وماج وهو بيدور على اليد الدينئة اللى عملت فيه كده ومش لاقيتها

وفى تقديري الشخصي ان فى اتوبيس من ماركة عليه السردين التحرش بيبأه عمياني راجل أو ست موش مشكلة عند المتحرش اهو كله ماشى بطريقة ميضرش ومرة تصيب ومرة تخيب .. واهو برضه بيحقق مبدأ أصيل من مبادئ حقوق الانسان وهو مساواة الرجل والمرأة.

وإذا كان التحرش اللى بيحصل دلوقت اغلبه او كله تقريبا منصب على المرأة فى مترو أو أتوبيس أو حتى فى الشارع يخلينا نسأل سؤال اللى طرحه علينا الأخ المهيس فى قعدة القهوة واللى هو (ليه بيحصل تحرش جنسي للبناات؟! ) .. الكثير من اللى أجابوا عن السؤال ده حصر الاجابة فى جملة واحدة وهى (ان

الحجاب هو الحل ) ولما يقولوا حجاب قصدهم الحجاب الشرعي مش الحجاب التيواني .. لكن واحدة من القرشانات من بتوع جيل الستينات وإحدى راكبات أتوبيس الغبرة قالت وهى بتمصمص شفايفها وبتتحرس على زمن المنى جيب الجميل : (إحنا كنا زمان بنلبس محزق وملزق وفوق الركبة ولا كان على إيامنا تخرش ولا حاجه ..) وعلشان تكون الصورة مكتملة حنقلكم رأى تالت لواحد من بتوع علم النفس فى أحد الجرايد قال ( ان المتحرش فى الاتوبيسات بيعاني من اضطراب جنسي تحككي ) .. حلو المصطلح ده ! .. بس أنا رأيي الشخصي هو وسط بين كل الآراء دي ايوه فيه منقبات ومججبات حجاب شرعي موش تيواني بيتم التخرش بيهم لكن دول قلة ومتحسبش الحجاب التيواني فى الحسبة .. كمان فيه حالة من الكبت الجنسي بسبب ارتفاع سن الزواج من ناحية ومن ناحية تانية البطالة اللى هى اصل كل بلوى .. عموما القضية دي مهمة .. لان احساس اى انسان بالامان فى الشارع مهم جدا .. بس اهم حاجه تخلى بالك وانت راكب اى اتوبيس عليه سردين مش بعيد تلاقى اتنين او تلاته عندهم اضراب جنسي تحككي !!

# الجوانب السلبية

في

# الشخصية المصرية

- . مطرح ما ترسي دوقلها ...!!
- . إحنا اللي دهنا هوا دوكو...!!
- . من بعد راسي ما طلعت شمس ...!!
- . العلبة دي فيها ايبيبيبيبيه ...!!



.. فيرد الفلاح ومن غير حذف اجابتين كمان يا فرعوننا المتفرعن .. فيضطر الفرعون إنه ينادي فرج .. ويبدأ فرج في مد الفلاح على رجليه ( كانوا مدلعنهم اخر دلح زمان ) لغاية ما يقول الفلاح بمكان الفلوس ويذهب جند الفرعون علشان ياخدوها .. وطبعاً بقية الفلاحين اللي كانوا ناويين يعمله زيه بقوا يدفعوا من سكات .. طب ما كان من الاول يدفع بالذوق مهو عارف اخرتها ! لكن أبدا .. لازم ياكل العلقة التمام علشان يقر ويعترف .. ومن هنا سطرت في سجل فهم الشخصية المصرية عند البعض هذه العبارة ( المصري لازم ينضرب علشان يمشى عدل) .. ورغم انى موش موافق على الجملة دي لان مصر على مدار تاريخها أثبتت ان فيها (رجالها ووقفوا وقفة رجالة) لكن ده ميمنعش ان ممكن يكون فيه قطاع كبير كده خلت العبارة دي تطلع .. وتعالوا كده نتأمل حالنا .. من واحنا صغيرين في المدرسة كانت العصاية هي البعع وهي العفريت لنا .. فكنا موش بنعمل أى حاجة خوفا من عصاية المدرس .. مبأش الواحد فينا بيعمل أى حاجة عن إقتناع ومن منطلق الصبح والغلط بقدر ما هو الخوف اللي بيحرك فينا كل حاجة .. ده حتى لما تلاقى دكتور في الكلية بيعامل الطلبة بإحترام وعاملهم شخصية ، بالعربي كده الطلبة بتركبه .. وموش بتعمله اى اعتبار .. لكن لما يطرد طالب او اتنين او يهزقهم او يسحب كارنيهتهم تلاقى الباقي كله زى الألف من الخوف احسن يحصل لهم زى ما حصل للضحية زميلهم .. يباء القضية ان فيه خلل في الشخصية بتاعتنا اللي إتربت على الخوف واللى اتربت على انها لازم تتهدد ولأزم تتوعد علشان تسمع الكلام وتمشى على الخط المستقيم وبالتالي فالمثل القائل ( اضرب المربوط يخاف السايب مجاش من فراغ)

\*إبن مين فى مصر



(إنت موش عارف إنت بتكلم مين) .. (أنت موش عارف أنا بن مين فى مصر) .. دى العبارات اللي على لسان الشخصية المصرية المسنودة .. من فترة شاهدت موقف فى إشارة المرور لما عربية ملاكي أرادت كسر الأشارة والعسكري الغلبان منعها فكلمه الراجل اللي راكب من الشباك بكلام مسمعتوش من مكاني بعدها لاقيت العربية بتتحرك تاني لتكسر الاشارة فوقف أمامها العسكري ووضع المانع الحديدي قدامها .. فنزل له الراجل اللي فى العربية وعازب يتعارك معاه مهددا ومتوعدا مرددا الجملة الى سمعناها فى اكثر من فيلم عربي (إنت موش عارف انت بتكلم مين) .. ووقف الناس مع العسكري الغلبان فى موقفه ودعموه .. هى القضية ان الشخصية المصرية لما بيكون فى إيدها سلطة أو بتكون مسنودة بتفتري إلا من رحم ربي .. ده تحليل دقيق للشخصية المصرية .. وحتى لو كانت الشخصية المصرية لا هى مسنودة ولا نيلة فتقوم بالتمسح فى أى شخصية مسئولة حتى ولو كان لا يعرفها ولا تعرفه فحدث مرة ان واحد قعد يصدعنا بخاله اللي شغال فى جهاز أمني معين وفى الاخر اتضح لنا ان خاله ده بيقدم قهوة وشاي فى الجهاز ده .. فالشخصية المصرية بتعتمد بشكل كبير على إنها لازم تكون مسنودة ولو موش مسنودة تدعي انها مسنودة

لاقتناع منها إن اللى ملهوش ظهر ينضرب على بطنه .. والسبب فى الاعتقاد ده طبعا هو المجتمع اللى فرق فى المعاملة بين ناس وناس .. وكان ده السبب فى ترسيخ الاعتقاد المصري الصيت ولا الغنى .

## ٢- إمانا اللى دهنا الهوا دوكو..!!

الشخصية المصرية لاشك إنها من الشخصيات المميزة على الساحة العربية سواء بأه بتكوينها الثقافى أو بخفة دمها أو بتبسطها للأمور الجسيمة لتبدو صغيرة وتافهة .. وكان تهوين الامور على النفس بالنكات وغيرها .. لكن الغريب ان الحاجات الايجابية دي أفرزت حاجات سلبية فى التركيبة المصرية وموش بس المصرية فى الشخصية العربية بشكل عام .. الاشياء دي منقدرش نقول انها موش خطيره .. فهى خطيرة فى حد ذاتها وفى اللى ممكن يترتب عليها .. وإنما تصبح عادة مصرية .. فى الحلقة الثانية من (الجوانب السلبية فى الشخصية المصرية) حناقش نقطتين أنا شايفهم أصبحوا زى المرض فى المجتمع ودول فى حقيقة الحال لم يظهروا فى الشخصية المصرية إلا لاعتقاد الشخصية المصرية فى نفسها بـ (الحداقة) (واحنا اللى دهنا الهوا دوكو) و (اللى تغلب به العب به) .. وهكذا .. فترسبت كل السلبيات دى فى شخصيتنا .. نحللها .. ونتكلم عنها فى الجزء ده .

### \*قهوتك عندي



أصبح عادي جدا في أى مصلحة حكومية أو حتى غير حكومية إن تسمع كلام عن القهوة .. موش القهوة اللى بتتشرب... لا دى القهوة اللى بتندفع .. فالشخصية المصرية نظرا لانها خجولة واللبيب بالاشارة يفهم تم إصطلاح لفظ ( القهوة) بديلا عن الفلوس اللى بتندفع نظير الإسراع بخدمة ما .. رغم ان الخدمة دي من المفروض يعنى انها تتعمل مجانية وان الموظف او العامل ده مفروض انه يقبض مرتب نظير قيامه بالخدمة دي .. وبسبب الروتين أضطر المواطن إنه يدفع القهوة دي علشان مصالحة تمشي وإلا حيفضل إلى يوم بيعثون .. لكن هل المواطن لما يدفع فلوس علشان يمشى مصالحة ده حرام ولا حلال؟! .. وهل اللى بياخد الفلوس دى حرام ولا حلال؟! .. نظرا لان الشخصية المصرية بطبيعتها متدينة فكان لا بد ان الضمير المصري يوجعه... وعليه لا بد من حل... فاللى بياخد الفلوس دى تحت مسمى القهوة مصبر ضميره ومنيمه بإنه بياخد ( ملاليم) فى الوقت اللى ناس فيه بتتهرب بـ ( الملايين) وإنه بياخد مرتب موش بيكفيه هو شخصيا فإزاي الحال بأه وهو مسئول عن أسرة كاملة! .. أما المضطر انه يدفع القهوة دي فأنا موش ضدها طالما ان هو عايز يمشى مصالحة وموش حياخد نصيب حد تاني او ياخد مكان حد تاني هو اولى منه وهكذا... وده طالما انه موش عارف ياخد حقه إلا بالطريقة دي .. لكن اللى بياخد الفلوس ده انا بصراحة بأطلق عليها ( رشوة) وهى كده فعلا .. سواء كانت جنيهات قليلة أو ملايين موش فارق الكم ادايه فى وجود الفعل نفسه .. أما التحجج بأه بالمبررات أو لو عايز الدقة (المسكنات الضميرية) بالوضع العام وإنه مجبر على كده... أعتقد ان لو كل واحد إحتاج مد ايديه حتبأه كارته وحينتفي باه معنى الحرام تحت الملحاحات الاجتماعية .. ومشكلة القهوة دي يعنى مباتش فى المصالح الحكومية او غيرها بس دى إنتقلت حتى للحياة العامة .. يعنى إنت مجبر فى أى مكان عام إنك تدفع تبس ( بقشيش) .. والاجبار ده موش من النوع الالزامي ولكن علشان تضمن جودة الخدمة .. وهكذا الشخصية المصرية إستحلت القهوة وأصبحت القهوة شىء ثابت فى عقل الشخصية المصرية اللى بتعتبر ده شطارة وإن الشطرة تغزل برجل حماره .

\* الفهلوة



المصري يتميز في شخصيته إنه فهلوي ومجتهوش ولادة ويفهمها وهي طائفة .. ده اللي بيعتقده المصري في شخصيته .. وعلى هذا الأساس بيتصرف في كافة أموره الحياتية خد عندك مثلا عدم الاتقان في العمل تحت شعار (أهي ماشية) خد عندك كمان الطالب في كليته موش بيدكر غير في ليالي الامتحان ظنا منه انه بفهلويته حيختصر منهج ٤ شهور في كام ليلة وحيطلع من المقررب زهرة الزهرة ويعدى وينجح وموش بعيد يطمع كمان إنه يجب تقدير .. شغل الفهلوة أصبح مسيطر على حياة المصري بدرجة منقطعة النظير لدرجة إنها ممكن توديه في ستين داهية .. زمان في الثمانينات (أيام ما كنت أنا وأنت عيال صغيرين) ظهرت مجموعات إقتصادية لناس بدقون سموا نفسهم شركات توظيف الأموال واللى كانت منها مجموعة السعد الشهيرة .. المجموعات دى كانت بتلم فلوس من الناس على أساس انها حتوظف لهم الفلوس دى في مشروعات والقرش حيوجب عشرة واللى معاه جنيه حيكسب من وراه خمسه ... وكل ده والمواطن قاعد مأنتح في سريره .. ونظرا لان نظرية الفهلوة متأصلة في المواطن المصري قال وماله نشغل فلوسنا واحنا قاعدين في بيوتنا ونكسب ونستكنيص واحنا بنقرقز لب واشطة الكلام .. واللى حصل ان

الشركات دى طلعت شركات نصابة واخذت الفلوس وخلعت .. وهنا لطم المواطن المصري على فلوسة اللى راحت .. وكل ده بسبب الفهلولة إن لما واحد معاه مليون ولا غيره ممكن يستثمرهم فى مشروعات ويكسب منهم لكن الاستسهال مع الفهلولة هما اللى وقعوا الضحايا فى قبضة النصابين .. وبرضه خلىنا نقول إن النصابين دول إستخدموا مبدأ الفهلولة كيان ما هم مصريين برضه والفهلولة لا تفرق بين مصري وأخر اللهم إلا فى كيفية الاستفادة من الفهلولة دى وإستنطاع المغفلين وإزاي يبيعوا للضحايا دول الوهم ويطمعوهم وزى ما بيقال الطماع فريسة للنصاب .. الحكاية دى كانت فى الثمانينات والمفروض الناس تتعلم من أخطائها .. لكن نظرا لان الطابع الفهلوي متأصل فى النفس المصرية ومكون اصيل من مكوناتها ظهر لنا حديثا بدل شركات السعد شركات (البوشي) .. والبوشي ده رجل الاعمال المصري اللى بيتحاكم فى دى حاليا بتهمة النصب زى بالضبط اللى حصل فى شركات توظيف الاموال .. البوشي ده خدع الناس اللى حطت فلوس بالهبل عنده على أمل برضه القرش يجيب قرشين وهم مأنتخين فى بيوتهم .. والبوشي ده مخدعش بس الناس البسطاء ده خدع مسئولين كبار ولسه الجرايد نشره مؤخرا انه نصب على وزراء مسجلين عنده باسماء مستعاره وممثلين وممثلات ومذيعين ولاعبية كوره يعنى الراجل مخلص .. وكان المفروض ان الناس تتعلم من اللى حصل قبل كده .. لكن زى ما قولت الفهلولة غالبية .. وبتجرى فى الدم المصري جري

### ٣ - من بعد راسي ما طلعت شمس !!..

فيه مثل شعبي مصري اصيل بيقولك ( من بعد راسي ما طلعت شمس) .. والمثل ده بلاشك لينا تحفظ عليه كبير لأنه في الواقع بيدل على الانانية وعدم الاهتمام باللى بيجرى حوالينا من امور .. ولأن كل ما يجري في بلدنا أو حوالينا هو بالاساس بيمس كل واحد منا فمينفعش نقول المثل ده اللى بيدل على الدماغ الفاضية المكبرة لكل شىء حوالياها .. وإعتقاد مني إن فهم الشخصية المصرية يكون من واقع أمثلتها الشعبية للوقوف على طريقة تفكيرها كنت أبحث مع كل صفة سلبية عن ما يعبر عنها من الامثلة الشعبية وإستمرار في السلسلة دي في رصد سلبيات الشخصية المصرية كان لنا وقفات تأملية في هذه الحلقة مع بعض الجوانب السلبية في شخصيتنا المصرية

#### \* تكبير الدماغ



من المعجم الشبابي الجديد شوية مصطلحات من أمثال (كبر) و(نفص) للدلالة على الاستهتار بحاجه معينة وعدم التفكير فيها .. ورغم إن المصطلحات ممكن تكون جديدة على اللسان المصري من حيث انها مصطلحات شبابية لكن هى قديمة في مدلولها اللى تعني الاستهتار في معالجة بعض الامور .. فالشخصية المصرية من قديم الزمان ترسخ في ثقافتها الانتخة الفكرية .. فاللى بيسبب له إزعاج فكري موش يفكر فيه ويكبر دماغه .. فغالبيه الشعب المصري عنده دماغه عزيزة عليه اوي وموش بيحب انه يضايقها بأى حاجه حتى ولو كانت الحاجه دي مهمة وملحة .. فظهر بأه مصطلح إن الواحد يعمل دماغ .. وموش

حتتكلم عن طريق عمل الدماغ اللى بتختلف من واحد للثاني طبقا للترامة و اخلاقة ونشأته لكن حتتكلم عن الابهال العام الناتج بسبب طريقة ( تكبير الدماغ) .. وتعالى مثلا شوف ..الدولة عملت لينا صناديق علشان الناس ترمي فيها الزباله ومنتشرة فى كل حته .. طب السؤال لما الصناديق دى منتشرة فى كل حته ليه بأه بنشوف أماكن فى محافظات مصر وخصوصا القاهرة فيها جبال من الزباله؟! .. وتلاقى أراضي فاضية أو مهجورة إتحولت لمقالب زباله؟! .. العيب فى مين؟! .. بلاشك العيب فى المواطن المصري وثقافته .. يعنى واحد معاه كيس زباله مكسل يمشى لأول الشارع علشان يرمي كيس الزباله فى الصندوق فيرميه فى اى حته وهو بيردد بينه وبين نفسه (يا عم كبر دماغك) .. طريقة تكبير الدماغ سمة مصرية وبمجرد ما حد يلاقى كيس زباله مرمي فى مكان فحتلاقي كله يرمي فى نفس المكان لتتكون قمم من الزباله بسبب الإستسهال وتكبير الدماغ .. ده مثال بسيط لكيفية تكبير المواطن المصري لدماغه .. حتى اصبح تكبير الدماغ جزء من الشخصية المصرية .. وإمتد التكبير ده لشغل المواطن المصري فالعك والشغل اى كلام دلوقت حاجه واضحة وضوح الشمس .. هات مثلا كهربائي ولا سباك ولا نجار علشان يعملك حاجه معينة وحتلاقي العك وعدم الاتقان فى الشغل .. فكل همهم انه ياخدوا منك فلوس على حاجه اى كلام .. عدم الاتقان ده فى الصنعة مع فساد الدمم والضماير ناتج عن التكبير فى الدماغ .. وفى نوعيات من الناس موش بتشتغل أصلا يعنى تروح لوحد سباك علشان يجيب يصلح لك حاجه موش يرضى يجيب معاك رغم ان حاله يصعب على الكافر وشكله محتاج لكل ملهم لكن يقولك ( انا موش بتشتغل طالما سجائري فى جيبي فأنا سلطان نفسي) .. يعنى مكبر دماغه على الاخر وكإنه موش بيشتغل بس إلا علشان يجيب ثمن علبة سجائر ولما تتحقق له أمنيته يأنخ ويبلط فى الخط .. فحالة التكبير وصلت لمرحلة غريبة لدرجة إن الناس موش عايزة تحرك دماغها شوية وكل واحد عامل لدماغه وموش يفكر ولا يتأمل فى أى حاجه شوف مثلا كام واحد بيقرأ جرايد وبيتابع اللى بيحصل حواليه كل يوم؟! .. اقل القليل اللى بيعمل كده .. ولوكلمت حد فى ده حيقولك ياعم كبر هو احنا لاقين العيش الحاف لما ندفع جنيه كل يوم فى جرنال يعنى ٣٠ جنيه فى الشهر .. رغم ان ممكن تلاقيه بيضيع اضعاف المبلغ ده فى حاجات تافهة .. لكن هى الدماغ واخدة موقف الكتير والتنفيض وحتى لو جاب جرنال محل كلمات متقاطعة أو يتابع أخبار الممثلين و خلاص بعدين يفرش الجرنال علشان ياكل عليه .. طريقة التكبير والتنفيض أصبحت جزء لا يتجزأ من الشخصية المصرية وملح سلبي من ملاحظها ياريت نتخلص منها .



الخرافات في المجتمع المصري حازه كده عاملة زى الوباء .. ومشكلة الخرافات دي موش إنها مثلا خاصة بفتة معينة من الشعب ممكن نقول عليهم جهلة أو متوسطين التعليم ولكن الخرافات لم تترك أحد حتى وصلت إلى أساتذة الجامعات .. يعنى لما نلاقى أستاذ في جامعة أو أى حد وصل وأخذ أعلى الشهادات رايح علشان يقف قدم ضريح لاحد الاولياء وعمال يتمسح بالضريح وينادي صاحبه أعمل دي وإبعد عني دي .. لا يمكن لعقل سليم يتخيل إن واحد يروح يكلم واحد ميت ويقعد يرددش معاه ويحكيو قصة حياته .. خد عندك مثلا عند ضريح الامام الشافعي - رحمه الله - حاطين صندوق علشان يتلقوا فيه النذور من فلوس وخلافه المهم لما بتيجي إدارة من الاوقاف علشان تفتح الصندوق وياخدوا الفلوس بيلاقوا مع الفلوس جوابات مرسله للإمام الشافعي رحمه الله .. ومجلة الشباب نشرت صور الجوابات دي في المجلة وهى مكتوبة بخط اليد .. ومن ضمن الجوابات دي واحد باعت جواب للإمام الشافعي بيقوله يا إمام هاتلى حقي من الحرامية اللي سرقوني وبيحكى قصته وموقع الجواب باسمه ومهنته .. ولو بصيت لمهنته موش حتلاقيها مثلا بائع متجول علشان نقول ده واحد على اد حاله ولكن كاتب مهنته إنه محاسب .. وواحدة تانية باعته جواب علشان عايزة تتجوز .. يعنى أى عقل يتخيل إن فيه ناس بتكلم ميتين والمصيبة انهم بيعتلهم جوابات وجايز كمان يكونوا مستنيين الرد .. بجهد حاجات تطير المخ .. فالشريعة الاسلامية ابدأ مفيهاش الخرافات دي إطلاقا ولكن الشريعة قالت لما تزوروا القبور نلقى فقط السلام على أهل القبور .. هى كلمة واحدة تقولها ( السلام عليكم ) غير كده مفيش .. والعجيب ان الناس اللي عاملة نفسها مثقفة في البلد محدش انتقد الوضع ده وسايين الناس عايمين في بحور من الخرافات والبدع .. والازهر الشريف سايب الناس دي للأسف ومطنشهم لان صناديق النذور اللي عند السيد البدوي والمرسى ابو العباس وغيرهم بتجيب سبويه حلوة وفيه ناس منتفعة من بقاء الوضع ده على ما هو عليه .. موش بس موضوع القبور والاضرحة دي اللي الخرافات شغالة فيها ليل و نهار .. هناك كمان الدجالين المتاجررين بعقول الناس .. وأغلب ذبائن الدجالين موش عارف ليه الستات! .. وكثير من الفنانات والممثلين بيروحو للدجالين واتنشر في ده كلام كثير على لسان دجالين وقعوا في ايد الشرطة .. فالشخصية المصرية للاسف أصبحت تصدق الدجل والشعوذة .. حتى قرأت عن مجموعة من اساتذه الجامعة عاملين شقه لتحضير الارواح والضحك على السذج وإيهامهم انهم ممكن يحضروا روح دكتور فلان الفلاني علشان يعملهم عمليه لو كانوا مرضي او يحضروا روح موش عارف مين علشان يقولهم على سر وهكذا .. إستخفاف بالعقول لدرجة لا يمكن تخيلها .. والناس بتصدق وعاشة في ميه البطيخ .. وموش

بس عامة الناس المصيبة ان شخصيات كبيرة جدا بتصدق في الهرتلة دي .. أنا قرأت في كتاب ( الحكومة الخفية ) للواء / جمال حماد إن (مراكز القوة) اللي أطاح بيهم السادات كانوا بيروحوا جلسات لتحضير الارواح علشان يعرفوا السادات مدبر ليهم إيه ، ونشر في الكتاب تحقيقات النيابة اللي كانت بتجرى معاهم والى فيها الكلام ده .. هل من الممكن اننا نتخيل ان الناس اللي كانت بتحكمنا في فترة من الفترات كانوا بيروحوا جلسات لتحضير الارواح .. كيف وصلت الخرافة لتقتحم العقول للدرجة دي؟! .. مين السبب عن ترويج الخرافات؟! .. فشخصية زي (أنيس منصور) مشوشة الفكر ولا يكتب كلام له قيمة من وجهة نظري ايه مصلحته الشخصية لما يكتب كتاب علشان يروج فيه لفكرة تحضير الارواح ويستعين بقصص لناس غربيين مجهولين ساقطي العدالة علشان يثبت صحة منطقتهم!! .. هل الاثارة والدجل والخرافة باه وسيلة لانتشار كتب الناس دي؟! .. وكله على حساب عقل الناس البسطاء اللي وقعوا ضحية خرافاتهم .. وكل الحكاية في تحضير الارواح انهم موش بيحضروا اى ارواح ولكن بيحضروا الجن لخداع الناس في نوع من السحر الاسود الملعون .. وكل ده والناس عايمة في مية البطيخ ومصدقة الخرافات حتى دخلت الخرافات في مكونات شخصياتهم بسبب الجهل وبسبب شوية مجموعة منتفعين من إستحمار الناس .

## سرقوا الصندوق يا ابو لمعة!!!...

نفسى أعرف الناس حرامية الجوامع دول جنس ملتهم ايه!..  
 الناس تدخل تقول ((الله الكبر)) ودول داخلين يتسحبوا علشان يسرقوا (الجزم)  
 علشان كده تلاقى فى الجوامع عملوا دلوقت خزن كل واحد يحط فيها جزمته وبتتقفل بمفتاح  
 وبمناسبة الخزن دى  
 مرة كنت أنا وواحد صاحبي بنصلى فى جامع كبير على البحر  
 وكل واحد فينا حط الجزمة فى خزنه من اللى موجودة وقفل عليها وحط المفتاح فى جيبه  
 وبعد ما خلصنا الصلاة  
 راح زميلى يا ولداه يفتح الخزنة  
 وخير اللهم اجعله خير لاقاها فاضية  
 الراجل بص للمفتاح وللرقم الموجود عليه وللرقم الموجود على الخزنة  
 غريبة ..  
 الرقم واحد..  
 الجزمة اتسرفت يا رجاله  
 وبعدين جه واحد من ادارة المسجد  
 يا عم الحج حصل كذا وكذا  
 بص الراجل بإندهاش وقاله ((بس المفتاح معاك))  
 بصراحة جملة الرجل دى خلتنى افطس من الضحك ، فكرتنى بالمثل الشعبي (سرقوا الصندوق  
 يا ابو لمعه ، قالمه لكن مفتاحه معايا)  
 وفى الاخر لم يكن امامى صاحبي إلا خيارين يا إما يروح بشبشب ويا إما يتصل باخوه يلحقه  
 بجزمة إستبن ، وطبعاً اختار الحل التاني ، فمش معقول يمشى على البحر بشبشب يعنى !  
 دى بأه من الحالات اللى خلتنى لما اصرى فى اى جامع لازم تكون الجزمة بتاعتي قريبة منى أو فى  
 محل نظري .. ورغم كده كنت برده حتسرق لولا لطف ربنا فمرة دخلنا نصلى فى جامع صلاة  
 العصر وكانت الجماعة الاولى خلصت ، فطبعى نعمل جماعة تانية

المهم قاعدين نعزم على بعض مين اللى يطلع امام وده يقول لده اتفضل وده يقول ده لا عيب  
اتفضل انت وكده..

وبعدين فجأة طلعلنا واحد مش عارفين طلع منين وجاى من ناحية الباب ورافع صوته (( أنا  
اولى الناس بالامامه ، ولقد قال رسول الله كذا وكذا )) قلناله يا عم خلاص ادخل وصلى بينا..  
المهم فى الركعة الاولى سجد بس عشر دقائق

دخلنا فى الركعة الثانية سجد عشر دقائق وطول اكر مش عاوز يقوم

قلقنا كلنا

رفعنا راسنا

ملقنا هوش

فلسع

سرق نص الجزم وهرب

وحدت ربنا انى مكتتش ضمن المسروقين

وإلا كنت روح بشبشب

المره الثالثه باه واللى حصلت برده فيها حكاية سرقة الجزم دى

كانت فى صلاة الجمعة

لكن المره دى الحرامى اتمسك

وعين ما تشوف إلا النور

وهاتك يا ضرب

وأنا بأيت اضرب بغل

وكانت معركة ضارية لدرجة ان الراجل كان حيبوس ايدينا اننا نسلمه للشرطة ونرحمه

فأنا يعنى عاوز اعرف حرامية الجوامع دول مش لاقيين غير المصلين يسرقوهم

علشان كده اقولك لو وقع فى ايديك حرامى من دول مترحمهوش

اديله ضرب للصبح

لغاية ما بيان له صاحب.

وأكيد

مش حيان

## السلطانية لا تزال على رأسى

الواحد مننا لما يجب يعمل فيها فهلوي وبيفهمها وهى طيارة وان مفيش حد بيشتغله يجب يبين إن اللى قدامه معرفش يضحك عليه يقوله ساخرا (لبسنى السلطانية ياض) .. مع أن الحكاية كلها مش مستاهلة يعنى ... لأننا كلنا لابسين السلطانية ومبسوطين .. أصل لبس السلطانية فى حد ذاته حاجه تفرح ... ده حتى زمان كان فيه مسلسل إذاعي بيتكلم عن فوائد السلطنة وان لبسك السلطانية ده شىء فى حد ذاته خيالى .. لدرجة ان مرزوق الصياد بطل المسلسل الإذاعي لما كانت موجه تشيله وموجه تهده حتى وصل لبحر الظلمات ونزل على جزيرة عليها ناس (سلط ملط) يعنى يا مولاي كما خلقتنى مسكوووووه وكانوا عاوزين يقتلوه وقالوا له هالهاااااا يا معلم انت عدو ولا حبيب .. قالم طبعاً حبيب .. قالوا له طب فى الهدية بتاعة الملك بتاعنا .. عاوزين ينفضوا جيوب الراجل اللى هى اصلاً خاوية .. الراجل معهوش حاجه ... يقوم بكل خفه ودلع يطلع (سلطانية) حلوة كده ويقولهم دى هدية الملك بتاعكم .. وياخدها الملك بتاعهم ويلبسها على رأسه ويبأه مبسوط أوى وشايفها شيك عليه ولا اجدعها سلطانية من الشانزليزيه ..

اهو احنا باه عاملين زى الملك ده لابسين السلطانية ومبسوطين وبنغنى لها كمان (يا سلطانية هنا يا رتنى كنت أنا) ونعمل لها فيلم (السلطانية لا تزال على رأسى) وأنا عندي فكرة السيناريو مجموعة من الناس لابسين السلطانية وفجأة طلع فيهم واحد وقلع السلطانية وقال كفاية سلطنة .. الناس حيعملوه كمجرم حرب وانه خارج عن النظام العام للسلطنة لغاية ما يعملوه غسل مخ مع شوية لعب فى الدماغ وترجع ريبا لعادتها القديمة وفى آخر الفيلم يلبس السلطانية مرة تانية والجموع الغفيرة تحده بالحضن ويشيلوه على أكتفهم هالهاااااا هووووب وهم يرددون شعار (السلطانية لا تزال على رأسى) وتنزل كلمة النهاية .. إيه رايبك مش قصة حلوة وممتعة نرصد من خلالها واقع السلطنة الطحن اللى منسجمين معاه اخر انسجام .. والغريب ان كثير مننا عارفين انهم لابسين السلطانية لكن محدش حتى بيحاول يرفع ايده ويرميها من على راسه .. لكن دائماً نكتفى بالبرطمة حتى تحول كل واحد مننا إلى برطمان من العيار الثقيل .. رغم انك ممكن

ترفض السلطانية في حاجات صغيرة وفي ايدك لكن تعمل ايه بأه اللي فيه داء ميطلوش ويموت  
المتسلطن والسلطانية على راسه ..

واخر سلطانية لبسها الطلبة الغلابة بتوع الثانوية العامة .. شغل حلبو حة على كبير .. وكمان مش  
يلبسوا العيال السلطانية بحنيه شوية .. أبدا .. يعنى أنا يا جماعة مش متخيل ازاي طالب يقعد  
يذاكر من شهر اغسطس ٢٠٠٧ ويمتحن في يونيو ٢٠٠٨ علشان يدخل الامتحان يلاقى واضع  
الاسئلة مطلع له لسانه ويقول له ضحكت عليك الاسئلة من خارج المقرر .. أو اسئلة معقدة  
محتاجه أينشتين علشان يحلها .. وهم ضربوا طلاب الثانوية العامة في المرحلة الاولى في التفاضل  
.. وفي المرحلة الثانية في الديناميكا .. مهو لازم يلبسوا السلطانية للعيال في مادة او اثنين علشان  
تعمل فرق في المجموع .. مش مهم عندهم بأه مجهود الطلاب ومش مهم أعصاب اولياء الامور  
الى كانوا بيوفروا من لقمتهم طول السنة علشان الدروس ومش مهم حرقه الدم المهم عندهم  
انهم يتصرفوا في اعداد الطلبة الكثيرة دي اللي مش حيلاقوا لهم مكان واللى اغلبهم كان حلمه  
كليات قمة .. ده كوم وتسريب الامتحان كوم تاني .. يعنى أى عيل من بتوع الديسكوهات واللى  
بيتسرح طول السنة ومعاه قرشين يشتري بهم الامتحان وخلصت القضية .. دي سلطانية  
معتبره اخدها كل طالب جاد وملتزم ... بعدين اصلا يا اخوانا التعليم كله من اوله لآخر  
سلطانية في سلطانية وملهبيه على ملوخية ده أنا ايام الكلية كنا بناخد تدريب على بعض الاجهزة  
بعدين ببص لجهاز من الاجهزة لاقيته بيطلع في الروح ومش مدى نفس ، فنديت على المعيد  
وقولتله يا باشمهندس الجهاز مش شغال قاللى الاجهزة دي للعرض بس ، قولتله للعرض بس  
ازاي ، قاللى لما تشتغل بره في سوق العمل مفيش الاجهزة دي خالص دي خلاص انتهت من  
ربع قرن .. أمال احنا كنا بتتعلم ايه!! ده على أساس خد فكرة واشترى بكره .. سلطانية التعليم  
سلطانية واسعة جدا عاوزه مجلدات تتكلم فيها ...

فيه سلطانية معتبرة تاخدها مثلا في أوتوبيس مكيف مكتوب عليه الاجرة ٣ جنيه .. تدخل  
الاتوبيس ده وتدفع زى الشاطر الـ ٣ جنيه بعدين لا تلاقى تكيف ولا بتاع ولا كلام نعان ..  
اصل الحكاية ان في الصيف بيفتحوا زجاج الاتوبيس وفي الشتاء بيقلوه كده بأه مكيف .. شفت  
ازاي تفانين معتبرة .. والادهى باه إننا بينا وبين بعضنا - نحن المتسلطنين - بنحاول نستكرد  
بعضنا ونلبس بعضنا سلطانية دوبل مرة كانت فيه واحدة ست واقفة على محطة القطار وكانت

بتكلم صاحببتها بصوت واصل للى واقف قريب منها- اللى هو أنا- بس مكتتش واخدة بالها منى .. وبتقول الرجاله دول أسوأ شىء فى الدنيا ولازم ينقرضوا .. المهم القطار وصل للمحطة وكل الركاب اللى على المحطة هاتك يا جرى علشان كل واحد يلحق كرسى .. واخيرا لحقت كرسى معتبر واياه كمان يا باشا جمب الشباك عدل .. المهم بعد شوية لاقيت الست دى جاية تكلمنى بكل ذوق وحنيه (( من فضلك ممكن تقعدني مكانك لانى مش قادرة اقف )) طبعا برستيحى كراجل لا يسمح ان اقعد وواحدة ست واقفة وطلبت منى انها تقعد لكن وانا بقوم بقولها ايه (( لو الرجاله انقرضوا بأه حتعملوا ايه )) فابتسمت وهى بتقول (( واحنا برده نستغنى )) .. فقولت داخل نفسى (( لبسينى السلطانية ياحتى ))

## لطالب قال هات الإمتحان وبلاش تلاعبني رد الأستاذ المادة طازة والمال

### عاجبني

زمان عندما كنا في المرحلة الابتدائية والإعدادية كان الأساتذة وخصوصا قبل كل إمتحان كانوا يلقون على مسامعنا مجموعة من الجمل مثل ان الغش حرام والى بيغش حيروح النار وإن من غشنا فليس منا.. ومع افول المرحلة الاعدادية وبداية الثانوية العامة تغير الخطاب الترهيبى بدل من أن الغش حرام أصبح الغش جريمة وان الغشاش حيثحرم من الامتحانات كلها وحيثحول للتحقيق .. والشاهد أنه سواء في التهديد الأول أو الثاني الطلبة لم يكفوا عن الغش .. واصبحت عملية إستغلال المراقب لها متعة ولذة خاصة .. فالمراقب كان بالنسبة للطلبة هو كوز الرخامة المتحركة .. وكان دائما المراقب المتساهل اللى بيترك الطلبة تطلع اللى معاها من برشام وخلافه ليلطشوه على ورقة الإجابة كان بالنسبة لهم الفارس والشهم والأب الحنون ومش بعيد كمان بعد الإمتحان يقولوا فيه قصيدة مديح من بتوع المتنبى في سيف الدولة الحمداني.

وأذكر وأنا في الإعدادية كان عندنا إمتحان مادة علوم وكان بيراقب علينا سيدتان حوالى في الثلاثينات من العمر في ذلك الوقت .. وكانت كل واحدة منهم عاوزة تغشش الطلبة لكن خايفة من زميلتها .. وبمجرد خروج واحدة منهم إلى خارج اللجنة علشان تعمل حاجه معينة أسرعت المراقبة الثانية لنا وقالت يله بسرعة اللى مش عارف حاجه يسأل اللى جمبه .. وبمجرد رجوع المراقبة الأولى إلى داخل اللجنة كان كل شىء على ما يرام .. بعدين حصل إن المراقبة اللى غششتنا خرجت بره اللجنة لنفاجأ بموقف طريف إن المراقبة زميلتها بتقولنا خلصوا نفسكم بسرعة قبل ما ترجع .. وهنا ضجت اللجنة بالضحك .. وده من المواقف الطريفة اللى الإنسان لا يمكن إنه ينساها.

وهناك مراقبين كانوا آخر رخامة حتى وصل بهم الحال أنهم مكنوش بيتساحوا مع الطالب اللى بيتم ضبطه بالمنوعات الدراسية .. وفي كثير من المرات أيام الجامعة حصل فيها حاجات زى دي وتم طرد طلبة إتمسكوا في وضع الغش بعد عشر دقائق من بدء الامتحان .. فالعلاقة بين الطالب والمراقب هى علاقة أكون أو لا أكون .. ولو سألت مجموعة من الطلاب أنت شايف مين

اللى على حق المراقب ولا الطالب ..حتلاقي إجابات متنوعة وحتلاقي اللى حيمسك العصاية من النص ويقولك الاتنين على حق .

فالمراقب شايف إن الغش حرام وده لو كان ملتزم وينظر للموضوع من الجانب الديني ... وجايز ينظر للموضوع من ناحية ثانية وخايف على نفسه من الخصومات والجزاءات لو إنكشف وهو سايب الطلبة بيخمسوا في الاجابات مع بعض .. أما الطالب فشاييف إن ده حقه وإن التعليم فاشل وإنه إتظلم تعليميا في فصل به ٤٠ طالب أو جامعة أحدث جهاز فيها يعود لعام ١٩٥٠م .. ويرى الطالب كمان إنه أحيانا واضع الأسئلة متعمد إنه يضيعهم ويخليه إمتحان إسود ومهيب على دماغهم .. وأوضح مثال على كده إن بعض الأساتذة في الكليات بيلعبوا مع الطلبة شغل حلمبوحة ... يعنى لما استاذ يقول في المحاضرة إن الجزء الفلاني مش جاى في الامتحان ويدخل الطلبة الامتحان يلاقوا أسئلة هذا الجزء ملطوعة في ورقة الأسئلة .. أكيد هيحصل إهتزاز وعدم ثقة في كلام أى أستاذ بعد كده ويدفع الطلبة إنها تغش ... ممكن تقول إن الطلبة تروح تشتكى .. لكن ده لو انت مثلا في امريكا .. لكن عندنا في بلداننا العربية ( الشكوى لغير الله مذلة ) .. وجايز تطلع انت كمان اللى غلطان ويشيلوك المادة او تتحول لمجلس تأديب .. فلو قولت للأستاذ بلاش تلاعبني حيقولك يا بنى المادة طازة والحال عاجبني ..

وده سبب أن الطلبة لا تستجيب لأى تهديد بتحقيقات أو غيره في حالة ضبطه متلبسا بالغش لإنهم ببساطة شايفين ان ده حقهم من وجهة نظرهم ، وشايفين إن الطالب منهم اللى بيعق في إيد المراقب هو من الأبطال الأبرار وده حتلاحظه في كم العيون الساخطة على المراقب وهو ماسك الطالب اللى وقع أسيرا في معركة الغش الحامية .. أما الوعيد الديني برده مش بيؤثر في الطلاب لان الالتزام الديني غائب عن المجتمع ككل وشريحة كبيرة من الناس -مش بس الطلاب- مش بيصلوا .. يبأه ازاى حتتوقع ان الوعيد الدينى يجيب معاهم مفعول .. أنا لا أوافق على غش الطلبة لأن الغش بشكل عام حرام .. وفي نفس الوقت لا اوافق على كل الظروف المحيطة بهم .. أصلحوا الظروف دي من تعليم وفساد أخلاق وأوضاع إجتماعية سيئة .. وهنا سوف تنتهى ظاهرة الغش بشكل عام مش بس الغش في الامتحانات .

## ربنا يبعد عنك افلام أمينة رزق وقراءة الجرائد وبرامج

### التوى شو .. قول أمين!

أنا من الناس اللي مش بحب الحزن ولا الاكتئاب ولا النكد .. ودائما ارفع شعار حناخد إيه من النكد والهلم غير حرقة الدم فباديها طناش .. وكنت دائما احاول لما أشوف حد مكتتب إنى اخرجّه من الحالة دي .. وده مش علشانه بس ، ده كمان علشان ماخدش أنا كمان عدوى الإكتئاب وأقع فريسة لفيرس التشائم والنظرات السوداوية للحياة.

وكانت جهودى فى إخراج الناس اللي يهمنى أمرهم من الحالة دي تذهب أدراج الرياح .. وكنت من شدة غيظى من فشل بعض محاولاتى معهم أقول فى نفسى (( خلاص بأه هما أحرار واللى بشيل قربة نكد بتخر على دماغه )) .. وأتذكر حوار كان بينى وبين سيدة كبيرة فى السن وكانت لسه راجعة من العمرة فى الأراضى المقدسة ، وكلمتها فى التليفون علشان ابارك لها ، أقول لها ( الحمد لله على السلامه ) .. فلك أن تتخيل جرعة الإكتئاب والتشائم اللي اخدتهم منها مرة واحدة والشكوى من الأمراض وإنها خلاص مش حتعرف تعمل عمره تانى وان نفسها ترجع تانى لكن الصحة خلاص .. وكنت لما احاول إنى أرفع من روحها المعنوية اللي ضارباها السلك لا أجد منها إلا مزيدا من كلمات الاحباط المتمثلة فى ( صعب ) و ( مش ممكن ) وغيرها من الكلمات الدائرية فى قاموس التشائم واللى بتوقف المراكب السائرة .. دى حتى لم تجامل كلماتى التفاؤلية وتوهمنى بشىء من الامل داخلها لكن هى أعطتنى سبل من كلمات التشائم حتى لا أتجراً وأكون متفائلا بعد كده.

فهل من حق المكتتب إنه يخلى الناس اللي حوالياه مكتتبه ويدفعهم دفعا هم كمان ليعيشوا سيمفونية نكدية من بتوع ( أمينة رزق ) الله يرحمها .. ولإن الاكتئاب حرية شخصية زيه زى حرية التعبير تمام فبرده التفاؤل حرية شخصية .. ومش من حق أى مكتتب إنه يحقد على المتفائلين ويسعى بكل ما أوتي من قوة للتبشير بفوائد الاكتئاب والتشائم .. مش كده وبس ده فضلا كمان عن دعوته المتفائلين ليضربوها إكتئاب ومناحة وبيأه الكل فى الهوا سوا ومحدث أحسن من حد وبيأه لا تعابرنى ولا اعابرك ده الإكتئاب طابلى وطايلك.

وحصل إنى قابلت مرة أحد الداعين إلى التشائم اللي مش بيطبق يشوف حد مبسوط إلا ولازم يرش جرعة التشائم التهام .. فكنت جالس على القهوة مع مجموعة من الاصدقاء وكنا بنتكلم



## رغم ان زيتهم بأه فلاص فى دقيقتهم لكن اطمئن فلن

### نتلولو ولن نتلملج ولن نتبمبج!!

على طريقة إمتحانات الثانوية العامة أقصد العامة أطرح عليكم سؤال للمتفوقين .. والسؤال هو هل هناك علاقة بين الإقتصاد والأخلاق؟! .. أو بين السياسة والأخلاق؟! .. طب تعالى نخلط كله ببعض ونعمل شأى بلبن ونقول إقتصاد فى السياسة أو سياسة فى إقتصاد هل لهم علاقة بالأخلاق!!

(نورينا هيرتس) هتجاوب على السؤال ده .. و(نورينا) مش إسم ممثلة من اللى بياخدوا ٢ مليون فى ٣٠ حلقة من مسلسل هابط وملل .. ولا هى دكتور فى جامعة بتدي رسائل من ماركة ((حتى)) .. (نورينا) واخده دكتوراه من جامعة ((كمبردج)) فى الاقتصاد .. يعنى الست عارفه هى بتقول ايه وبتتكلم فى تخصصها لا هى أفتت فى الدين ولا رفعت شعار (كله ماشى) زى ما بتوع ((حتى)) بيعملوا دلوقت .. الست دى عملت الشأى بلبن اللى بقولكم عليه وخلطت الاقتصاد فى السياسة ، وبصت للكوباية من بعيد وبعدين حطت عليها علامة إستفهام بتقول إيه هو المبرر الاخلاقى للرأسمالية علشان تبهدل المواطن وتطلع عين اللى خلفوه وتبيعه فى سوق الكانتو بتلاتة تعريفة ؟ .. وعلى مدار (٢٨٢)صفحة من كتابها (السيطرة الصامتة) بتحاول تجاوب على السؤال ده.

الشىء المهم فى العملية دي أن (نورينا) فى كتابها مش بتمسح بوخ لاحد .. ولا بتقول كله تمام .. ولا بتقول إن المواطن هو اللى حمار ومش فاهم الدنيا ماشية ازأى .. لكن (نورينا) ومع اول صفحات الكتاب بتقول بالفم الحياني ((يا جدعان الكتاب ده نصير للشعب ونصير للديمقراطية)) .. وحاولت أن تبين العلاقة بين السياسة والاقتصاد ووضحت ان الاقتصاد هو اللى بيتحكم فى السياسة .. والست نورينا -الله يسترها- بتوضح أن ممثليهم فى الانتخابات بيركعوا لرجال المال ومش بعيد كمان يرقصوا لهم عشرة بلدي .. ولفظ الرقص ده ذكرته (نورينا) على فكرة .. وبتوضح الست (نورينا) أن رجال المال مش بيدوا الفلوس دى كده لله وللوطن .. لكن شىء مقابل شىء .. وسياسة (شيلني واشيلك .. فمثلا كلينتون شال الضريبة من على البيرة مقابل تدعيم بعض برامجه بالمال .. يعنى الشعب يتكيف وتجار البيرة يكسبوا وكلينتون يمشى حاله .. وكمان شوف دى يا معلم علشان تتعلم .. أمريكا وست ابوها

بريطانيا عملوا زمان نظام هباب اسمه (إيشلون) علشان يتجسسوا به على المانيا النازية .. وكان شغال كفاءة .. لكن بعد لما سقطت النازية فنظام (إيشلون) كده حيتجسس على مين! مش معقول يخراطوه للوز!

قالوا خلاص نشتغل فى الازرق .. وقلبوها شغل بلطجة .. وسلطوا (إيشلون) على الشركات الرأسمالية الكبرى وسرقوا منهم الصفقات التجارية لحساب الشركات الامريكية .. ومن غير دخول فى أرقام كثير من اللى صدعت (نورينا) بها دماغنا أقولك إن (إيشلون) الهباب ده تسبب للتجارة الالمانية فى خسائر وصلت لـ ١٠ بلايين دولار فى عام ٢٠٠٠ م .. فلك أنك تتصور الكوارث اللى عملها (إيشلون) .. وإذا كان الهباب إيشلون ده بيخبط فى شركات غيلان برده وحيثان كبيرة من حيثان السوق فالعملية كلها مش مهمة لنا .. بس فى الاخر كله على دماغ المواطن .. لانه فى نظام مهيب زى ده الاغنياء بيطلعوا فوق والفقراء نازلين لتحت لغاية ما حيخرموا باطن الارض من النزول.

وزى ما انت شايف كده فى نظام عالمي زى ده بتتحكم فيه الشركات الراسمالية كان لازم على رجال السياسة انهم يحطوا ايدهم فى ايد الغيلان دول .. والعملية فلتت أوى مبأش مجرد تمويل لحملاات انتخابية .. ده زى ما بتقول نورينا اصبح رجال الاعمال هم السياسيين غير المنتخبين والسفراء والدبلوماسيين غير الرسميين .. وعلشان تعرف ان الخيبة والوكسة مش خيبتنا احنا بس ولو أن خيبتهم هما السبب والاحد واحنا خيبتنا موردتش على حد لكن شوف مثلا إزاي رجال الاعمال بيلعبوا بالبيضة والحجر فى عالم رجال السياسة فيه عاملين زى البطة البلدى اللى لا بتحل ولا تربط .. وتديك (نورينا) مثال بالاعلامى الروسى بوريس بيرسوفيسكى اللى شارك فى اطلاق سراح ٥٠ رهينة من الشيشان .. ومن غير لا سحر ولا شعوذة .. ونجح فى اللى فشل غيره من السياسيين فى تحقيقه.

فعالم زى ده من بتاع ((دعه يعمل دعه يمر)) يتحكم فيه رجال الاعمال فى كل شىء .. هل تتوقع مثلا فيه مكان للفقير! .. أو فيه مكان للأخلاق! .. دلوقت رجال الاعمال ورجال السياسية بأه زيتهم فى دقيقهم .. وأنت يا غلبان لا معاك لا زيت ولا دقيق .. بس لازم تعرف انها مش سايبه واحنا كشعوب مش ساكتين فإحنا متمسكين بموقفنا فلن نتلولو .. ولن نتلحج .. ولن نتبجح

!

## قالها المتنبى ورددها عبد الفتاح القصري واقتصرها ولاد

### البلد فى عود الكبريت

تعالوا نبدأ الموضوع من اخره بدون مقدمات طويلة .. ليه ديا الستات اللي عقلهم حصله حالة من اللسعان بيدندونوا ديا حول مسألة عدم اهمية غشاء البكارة؟! .. وليه ديا مثلا مش عاجبهم أن البنت تحتفظ ببيكارتها لغاية يوم الجواز .. وتلاقى كل قرشانة منهم تهز كتفها فى لا مبالاه وتقول (( وايه يعنى غشاء وراح )) (على وزن اغنية سمية (( اعتبره قلب وراح ))

!! وبعدين تلاقىهم طارحين السؤال الاهبل اللي صدعوا دماغنا بيه هو هل غشاء البكارة مثلا رمز الشرف والعفة؟! .. وهما اصلا بسؤالهم ده عاوزين يقولوا يا ناس كله عند العرب صابون يعنى اللي ببكارة زى اللي من غير بكارة وسلملى على البنجان .. لكن القصة وما فيها أن شوية الستات الخربانة فكريا دول عاوزين انحلال اخلاقى مقنن .. القضية مش مجرد قضية غشاء هما عاوزين يفتحوا الباب للزنا وللمارسات الجنسية ويشجعوا البنات على الدعارة وتبأه الحكاية عندهم بلا غشاء بلا بتاع .. وكنوع من الارهاب الفكرى يتهموا أى راجل بيصمم على حكاية الغشاء دى انه رجعى ومتزمت .. ويقعدوا يقولوا فيه ما قاله مالك فى الخمر .. ده مش كده وبس دول كمان شغالين فى الاسطوانة المشروخة بتاعة (( ده مجتمع ذكورى )) وليه لما الراجل يغلط بيباه عادي وليه الست لما تغلط بتبأه زى الخروف فى العيد الكبير .. وهكذا يدخلوك فى متاهات علشان يوصلوا لنقطة واحدة .. وهى نقطة كله عند العرب صابون .... وشيلنى ويشيلك ولاقيني ولا تغدينى وهالما جراباااا .. مع ان اساسا المصطلحات العقيمة دى بتاعة المجتمع الذكورى ومجتمع الرجال اصلا مصطلحات غريبة على المجتمع الاسلامي والعربي اللي ديا بتعامل من منطلق النصوص القرآنية اللي بتساوى بين الرجل والست فى العقوبة .. لكن المشكلة فى شوية ناس عملوا اسقاط لمجتمع منحل اخلاقيا - اللي هو طبعا المجتمع الغربي - على المجتمع العربي .. وانقل يا مرسى وارمى ولا يهملك حاجه !

فإرتباط موضوع غشاء البكارة بالشرف مكنش قضية محتاجة مناقشة ورطرطه من كل واحد دماغه تعباه .. وإن كان فعلا غشاء البكارة مش هو الدليل القاطع على العذرية وان العذرية اولا واخيرا متوقفة على حصول العملية الجنسية من عدمها .. وان غشاء البكارة ممكن يتهتك لاي

سبب .. بس عدم وجوده أكيد لازم يخلى الراجل تجيله وساوس وبلاش نقول شك .. لان الاصل ان الست عندها غشاء بكاره وأى حادث عارض ده استثناء .. فمش مطلوب من الراجل انه يخلى الاستثناء قاعدة والقاعدة استثناء .. فحالة عدم وجود الغشاء دافع للوسواس ومش حنقول الشك لان اختيار الرجل لزوجته وثقته فيها مش متوقف على الغشاء لكن فى نفس الوقت مش مطلوب من الراجل انه يحط اعصابه فى تلاجه .. لكن الراجل المفروض لو ملاقهوش يمسك اعصابه ولا يبادر بالاتهامات ويسال زوجته عن السبب .. وده اظن حق طبيعى للزوج ومش لازم الزوجة تعمل فيها المشكوك فيها وتسوق فى الحكاية.

فمسالة غشاء البكارة فيها طرفان ووسط ، طرف بيطنش وبيقول كبر الجى وروق الدى ..وطرف تاني لازم يلاقيه ومش مقتنع باى سبب عارض ممكن يكون ازاله ..وطرف وسط متمسك بغشاء البكارة لكن فى نفس الوقت لو موجودوش بيستفهم الاول عن السبب وممكن يعرض زوجته على دكتور للتأكد ان الازالة كانت بسبب غير الممارسة، وده سلوك انا اؤيده واطن انه من حق اى راجل .

فغشاء البكارة هام جدا مش عاوزين نخترل الشرف كله فى غشاء البكارة لان الاصل فى الشرف التدين والاهل والسمعة الطيبة .. ولان ممكن تكون البنت مارست الجنس ولسه عذراء او عملت عمليات ترقيع ، فسيظل عامل الدين هام جدا فى الاختيار .. لكن فى نفس الوقت لا يمكن ان نغفل اهمية وجود الغشاء وان عدم وجوده مصدر ازعاج للراجل .. لان الفطرة الانسانية جعلت من المرأة هى عرض وشرف الراجل .. وقديما قال المتنبي (( لا يسلم الشرف الرفيع من الاذى حتى يراق على جوانبه الدم )) .. ورددتها عبد الفتاح القصرى فى سيمفونية بن حميدو وهو ماسك السكينة للتأثر لشرفه .. واخترل ولاد البلد الجملة دى فى نظرية عود الكبريت اللى فيها شرف البنت ميولعش غير مرة واحدة.

أنا تكلمت عن الجانب والمنظور للقضية من جانب الراجل .. أما من جانب البنت فسيظل الالتزام الدينى هو الرادع ضد اى انحلال أو دعوات سافرة من ستات الله أعلم مين اللى وراهم واغراضهم ايه.

## لو الهرم الاكبر إتسرق .. مين اللي ميمسج دموع أبو

### الهول!!

المفروض إن أى حرامي يبتكر طريقة جديدة من طرق السرقة أنه يسجل الطريقة دي كبراءة اختراع .. علشان بس اخوانه الحرامية ميسرقوش افكاره .. مع انى عارف اساسا ان الحرامية ولاد بلد وجدعان أوى ومش بيقطعوا فى بعضهم وبيصونوا العيش والحلاوة اللي طفحوه فى زنزانة واحدة .. لكن برده مضرش وحرس ولا نخونش .. انا بقول الكلام ده ليه .. لأن يا جماعة لازم نشيد بأى طريقة جديدة ومبتكرة ونشجع المواهب .. وزى ما احنا عارفين ان السرقة والفهلوة دي مواهب برده .. والحرامي يا ولداه ما بيصدق يبتكر طريقة جديدة ومبتكرة تعدى من وراقفا الضحية .. رغم أن زمان كان الحرامية غلابة وعبط .. كنت تلاقى الحرامي اللي بيطلع اتوبيس الى أزحم من سوق العبور على امل أنه فى الزحمة دي يمكن يعلق محفظة واحد .. رغم انه فيه نسبة مخاطرة ان لو بسلامته اتقفش فعينه مش حتشوف إلا النور وقفاه حيكون أحمر من اللحمه الضاني فى العيد الكبير .. ولأن الحرامي أيامها كان ماشى بمبدأ الشاعر السكير بتاع (دع عنك لومى فإن اللوم اغراء وداونى بالتى كانت هى الداء) فكان مش بيحرم وكان غالب الامر أن كل واحد فيهم مكنتش بينام مرتاح قرير العين إلا لما يتصبح بالقفيان من الشعب فى الاتوبيس الصبح وبالمعاملة الرقيقة التى لا تخلو من المد على الرجلين وعلى الـ .. فى أقسام الشرطة.

دى باه كانت الصورة الخيبة للحرامي .. دلوقتي على رأى الفنانة التائبه حلا شيحا (( خلاص خلاص )) .. بأه فيه الحرامي المودرن .. حرامى اتربي فى عالم البيضة والحجر .. تلاقيه شيك وحاطط برفان من بتاع بلاد بره وبدله وجرفاته وأوعى وشك باه .. وكلنا فاكرين (الريان) وشركات توظيف الاموال والنصب اللي حصل .. وعلى رأى (عادل إمام) فى فيلم (كراكون فى الشارع) لما كان بيتكلم عن الحاج نادى بتاع كيس البلح (( والذبيبة طارت والنور اختفى وقال انت ملكش فلوس عندي .. )) اهى شركة توظيف الاموال مفروض تسجل كبراءة اختراع .. براءة اختراع فى النصب وشغل حلا حوش .. وبرده أول رجل اعمال أخذ قرض وفلسع مفروض انه يسجل الفكرة دي كبراءة اختراع له شخصيا .. ويرفع كمان قضايا على اى رجل اعمال تاني اخذ فلوس وكت على اساس انه سرق فكرته.

طب بلاش دول وتعالوا شوفوا فكرة النصب الجديدة دى اللى حصلت من فترة مش كبيرة يعنى ، علشان تعرفوا ان البلد بخير وعقول شبابنا لسه زى الفل .. طبعا عارفين نصاب الجيزة .. الراجل ده اخترع فكرة جديدة لنج في عالم النصب والراجل ده كان شعاره الدائم اللى ماشى عليه كل الحرامية تقريبا وهو (( الطماع فريسة للحرامي .. )) (الراجل ده كان بيشتري العقارات والاراضي و السيارات بضعف ثمنها .. بس ايه بأه كان بيدفع الربع كمقدم بس او اقل كمان على انه يسدد الباقي كأقساط .. بعد كده بيع اللى اشتراه بالسعر الطبيعي ويكت ويفلسع من غير ما يسدد باقى الاقساط .. اهي دى فكرة جديدة استغل فيها طمع بعض الناس .. يعنى اللى كان عاوز يبيع شقته بمليون جنيه يقوله حشترها ب ٢ مليون على شرط تاخذ الربع والباقي اقساط ... بعدين يشتري الشقة بالربع ويبيعها بالثمن الاصلى لها ويكت من غير ما يدفع باقى الاقساط .. الراجل اتعكش في الاخر بس أكيد فكرته الجديدة دى لازم تسجل بأسمه كبراءة اختراع ولا ايه .. ولو سيادتك اتصورت مثلا ان اى طريقة حرامي مش حتتكرر تاني لانها اصبحت مفقوسة ودقة قديمة أقولك لا يا عمنا بدليل أن عندنا مادة بتقول القانون لا يحمى الطرابيش أقصد المغفلين .. فطول ما في ناس لابسة السلطانية حتلاقي نفس الافكار بتتكرر ونفس المغفلين هم الضحايا.

طيب إذا كان طبيعى أننا نسمع عن واحد اتسرق أو شركة اتسرفت لكن الغريب أنك ممكن تسمع أن الحكومة اتسرفت .. دى غريبة جدا .. قرأت خبر غريب جدا في أحد المجلات يقول أن فيه كابل اتسرق من السعد العالى .. الكابل ده طوله ٣٠٠ متر ووزنه ٦ اطنان وتكلفته ٢١٠ جنيه .. طبعا الخبر غريب أن يتم سرقة كابل من السد العالى بالتكلفة دى والحجم ده فمسالة عاوزه وقفه .. لان ده مش كابل كهرباء في زقاق من زقايق إمبابة .. المهم والمضحك أنه وفقا لرواية الاستاذة (ناهد فريد) في مجلة صباح الخير خرج أحد المسئولين ليقول ان الكابل المسروق مش حياثر على محطة الكهرباء .. وكأن هي دى القضية ! القضية هي أكبر من كده .. ازاي يتسرق كابل كهرباء من صرح خطير زى السعد العالى ! دى هي القضية لان المفروض ان السد متأمّن كويس .. واساسا ازاي ٦ طن تتسرق بسهولة اوى كده .. بكره نصحى نلاقى الهرم الاكبر اتسرق بس المشكلة بأه مش في سرقة الهرم الاكبر .. المشكلة في ابو الهول مين حيمسح دموعة على سرقة الهرم الاكبر ! .. انفرج يا سيدى الحكومة بتسرق زيها اهو زى الشعب

---

...عاوزين مساواة ايه اكر من كده .. مش مصدقنى .. كان فيه زمان كوبرى الحرامية نزلوا عليه بالليل ومعاهم لحام وسيحوا الحديد بتاع سور الكوبري وخدوه وباعوه ... مش بقولك براءة اختراع .. البلد مليانة مواهب.



المهم في الحكاية انى كنت عاوز اعرف هل الحكايات اللى سمعتها والافلام اللى شفتها عن العفاريث دى حقيقى ولا لآ .. والحصيلة دى اللى حصلت عليها من المعرفة كانت حصيلة كويسة انى اقدر احكم على اى قصة اقراها هل هى تاليف وفبركة ولا ممكن تحصل . ومن ضمن تلك القصص حكاية (( عمارة الرعب )) اللى موجودة فى الاسكندرية فى ارقى الاحياء بها وهى منطقة (( رشدي )) .. العمارة دى يا جماعة دلوقت تساوى ملايين ومع كده هى عمارة مهجورة .. وظلت العمارة دى مصدر للحكاوى من اهل الاسكندرية والاشاعات كمان .. وكان السؤال اللى بيفرض نفسه يا ترى عمارة زى دى فى ارقى احياء الاسكندرية مهجورة ليه؟! .. طب وفين صاحبها؟! .. وطبعاً كانت الاجابة النموذجية ان العمارة دى ولا مؤاخذه مسكونة بالعفاريث .. ده مش كده وبس ده طلعت الحكاوى كمان عن سبب وجود العفاريث فى العمارة دي .. وأتذكر تحقيق صحفى قريته حول العمارة دي .. والصحفى عمل لقاءات متنوعة مع الناس المجاورين للعمارة .. اللى يقول أن العمارة كانت فى الأصل مسجداً، طمع فيه رجل أعمال فهدمه وأقام بدلاً منه عمارة سكنية فسكنتها العفاريث عقاباً له على فعلته .. واللى يقول إن العفاريث سكنت هنا لأن صاحب العمارة قتل فيها بعدما بناها فسكنها عفريته .. واللى يقول ان اى حد يسكن فيها يصحى بالليل من النوم ويلاقى الاثاث بتاع الشقة مرمى فى الشارع .. يمكن واحد بس هو اللى قدم تفسير منطقى وهو وحارس عقار احد العمارات المجاورة فقال ان العملية لا عفاريث ولا بتاع الحكاية وما فيها أن صاحب العمارة دي مات بعد ما بناها على طول، وأختلف الورثة عليها وحتى اليوم مازال بينهم مشاكل .

فمسألة العمارة دي غريبة وتحيط بها التخاريف من كل جانب .. لكن برده استوقفتنى حكاية تانية قرأتها فى موقع مصر اوى والكلام فيها للدكتور عبد العظيم المطعني الاستاذ بجامعة الأزهر واللى بيقول انه حصلت له حكاية غريبة فى القاهرة فيبحكى ويقول الأتي)) : كنت أعمل فى الأهرام وكنت أنهي عملي هناك فى وقت متأخر من الليل وكانت سيارة العمل توصلني إلى منزلي وقبل منزلي كانت توجد مكتبة تغلف الكرايس ويوجد من مخلفاتها بعض ما يسمونه الدشت ويقومون بجمع هذه القصاصات من الورق وتكويهما خارج المحل فى أنتظار أن يأتي عامل النظافة فى الصباح وعندما نزلت من سيارتي كنت أمام هذه المهملات فوجدت فجأة فتاة تخرج من وسط هذه القصاصات لم أتبين ملامحها ولكنها بدت على شكل فتاه عادية ولكن الحمد

لله ثبتني الله وفي الحال قلت أعود بالله من الشيطان الرجيم فاختفت هذه الفتاة في الحال وهذا

دليل على أنها ليست بفتاة من الإنس وإنما كانت من الجن))

وأنا يا اخوانا اعتقد ان الحكاية دى عادى جدا وممكن تحصل ، يعنى حكاية ممكن نصدقها ، وفيه تجارب للحكايات دى من السنة النبوية .. لكن تلاقى هناك حكايات تانية خالص اولا ملهاش دليل من السنة وتاني حاجه تظل حكايات قاصرة على اصحابها بس .. ومن ضمن تلك الحكايات زواج الانس والجن أو الحب بينهم .. لدرجة أن مجلة ( صباح الخير ) طلعت بتحقيق صحفى كبير من كام اسبوع وكانت طرحه تساؤل هل زواج الانس والجن حقيقى ولا خيال .. وطبعا كانت المعارضة من كل الضيوف واضحة وصريحة .. وبرده مسالة المس فرغم معارضة علماء علم النفس لحكاية المس دى وبعتبروها حيلة نفسية إلا أن كثير من علماء الشريعة برده كان ليهم موقف مختلف من حكاية المس ويأيدوها ..

يعنى الخلاصة يا اخوانا الى عاوز اقله أن كثير من قضايا الجن والعرافيت فيها خرافات كثير وللأسف الفضائيات ساهمت فى انتشار كثير من الخرافات دي ، واتذكر كانت هناك قناة على النيل سات متخصصة فى الحاجات دي وبعد كثرة الشكاوى أوقفت الحكومة المصرية مشكورة القناة المهيبه دي .. فاللى عاوز اقله انه فى ظل غياب الوعي الدينى أولا فالعقل سهل انه يقع فى كثير من الخرافات ، وفى نفس الوقت هناك حقائق عن غيبات اثبتتها الشريعة فمش لازم نتفرك وننكرها لان العقل لا يستوعبها .. أنا أتمنى نتعامل مع القضايا دى بشىء من الوسطية من غير انحراف وهرتله توصلنا للخرافات .. ومن غير تنطيط وفزلكة تجعلنا ننكر حقائق فيها

نصوص صريحة

## سيري يا نورماندي

فاكرين الرئيس حنفي والسفينة نورماندي .. نورماندي توووووووو .. أول ما حرم الرئيس حنفي المصون اعطت إشارة الانطلاق لنورماندي غرقت في شبر ميه .. ونزلت ومطلعتش .. مش عارف ليه افتكرت الحكاية دي وأنا بتابع أخبار سفينة الشحن المصرية اللي اختفت في البحر الاحمر من شهر يناير اللي فات ومحدث عارف هي راحت فين .. وبدأت الشركة الملاحية التابع لها السفينة بالتعاون مع مركز البحث التابع للقوات المسلحة المصرية في تمشيط البحر الاحمر .. وبرده مفيش فايده .. لا وجدوها عائمة ولا وجدوها غارقة في البحر .. الشيء المحزن في الحكاية كلها هم اهالي الناس اللي كانوا على متن السفينة دي .. لا هم عارفين اهاليهم احياء ولا اموات ولا أى حاجه ..

والاغرب أن مساحة البحر الاحمر مش كبيرة علشان ممكن حاجه زي دي تختفي ومحدث يعرف هي راحت فين ..

القضية دي كلها عجيبة في حاجة واحدة بس .. أن دولة تختفي داخلها حاجه ومش عارفه توصل لها .. وبعدين الحاجة دي مثلا ايه مش كيس جوافة ولا برتقال .. دي مركبة شحن .. وزى ما قال النائب ده بتاع مجلس الشعب اللي انا مش فاكر اسمه ، قالهم ( هو ايه .. اللي اختفت دي في البحر الاحمر إيره مش عارفين تلاقوها .. )

فبجد حاجه غريبة ..

يعنى انتوا فاكرين زمان لما كان صدام حسين عامل وش في ودان اللي متتسماش أمريكا .. طلع وزير خارجية أمريكا وقتها وقال يعنى هو صدام حسين فاكر انه بعيد عن عيننا ولا احنا ولا مؤاخذه مش عارفين هو بيعمل ايه ، ده احنا عارفين لون الملابس الداخلية بتاعة صدام حسين .. كده بكل وقاحة بيتفاخروا انهم بيعرفوا دبة النملة على الارض بالاقهار الصناعية بتاعتهم ، وبعدين مش على ارضهم بس ده على مستوى الكرة الارضية .. وبغض النظر عن كلام الامريكان إذا كانوا بينخعوا ولا كلامهم حقيقى .. إلا ان موقفنا احنا مش لاقى تعبير اقوله غير (( عيب )) .. عيب لما يكون ناس زي دول بيقولوا بيعرفوا دبة النملة واحنا مش عارفين نجيب سفينة اختفت داخل الحدود المصرية ..

وبعدين تحس في طريقة تعامل الناس مع قضية اختفاء السفينة دي بطريقة عادية .. يعنى عادى ماشى الحال .. وأنا شايف حقيقى ان القضية كلها فيها جانبين مهمين مش لازم نوصيهم عليهم .. الجانب الاول يا اخوانا هو الجانب الانساني ، يعنى لما تلاقى ابن قائد السفينة دي مش عارف اى حاجه عن ابوه لمدته شهرين أو أكثر حبتين .. ويروح لده .. ووده يرميه على ده .. ووده يقوله فوت علينا بكره .. واللى يقوله جملة (اسماعيل يس (المشهورة في مشاغبة الشاويش عطية ( والله يا بنى منا شايف)

فتحس أنك بتتعاطف مع الابن ده اللي بيدور على ابوه ومحدث إداله كلمتين تفيده في العملية دي .. الجانب الثاني واللى أنا إتكلت عليه من شويتين أن عيب احنا دولة كبيرة مش هافية يعنى .. مش عارفين نجيب سفينة شحن اختفت داخل حدودنا .. ازاي!

انتوا فاكرين الطائرة بتاعة التجسس اللي بعته امريكا على كوريا .. لكن الكوريين عكشوا الليلة ووقعوا الطائرة دي وجننوا الامريكان عليها وذلوهم .. الكوريين شغالين الله ينور ، واحنا بس مسكنهم مسخرة هما وبتوع الصين .. ودى طائرة تجسس ومع ذلك انكشفت لما دخلت حدود كوريا .. يعنى مش طائرة شحن ولا محملة بفساتين سوارية لستات كوريا ولا أى حاجه ... فيا اخونا دلوقت عاوزين السادة الاعضاء يتبرعوا ويقدموا إقتراحات لشركة الملاحة ازاي ممكن نلاقى السفينة دي .. يمكن ربنا يفتحها عليهم وإقتراح من بتوعك يضرب ويلاقوها .. أنا حبدأ في الاقتراحات ، وحقدم لشركة الملاحة إقتراحين ..

الاول : الاستعانة بالريس حنفى وحرمه المصون في البحث عن السفينة لما هم من سابق خبرة في

انتشال النورماندى .. ومش اى نورماندى .. دى نورماندى توووووووووو

الثاني : تأجير مركب من بتوع الصيادين ونأجر واحد على المركب دي برابطة ويلف ويمسح

البحر الاحمر وينادى على أسماء المفقودين .. يمكن واحد فيهم يكون فاقد الذاكرة يرد ولا حاجه



.. وطبعاً تمثيلية الظاهر بيبرس المصرية كمان بالمرّة اخر مهيسة ..

تخيل معايا كده يا برعي

وإسلاماه .. الفرسان .. الظاهر بيبرس المصرية .. الظاهر بيبرس السورية .. أربع أعمال درامية لفترة واحدة كل مؤلف مع نفسه وكأن مثلاً اللي بيكتبوه ده قصة شعبية زى قصة ابو زيد الهلالي مش تاريخ إسلامي ..

أنا مش ضد الحبكات الدرامية والاضافات الدرامية لكن متبأش الحكاية تزوير زى ما حصل فى مسلسل الظاهر بيبرس السوري .. أنا عاوز مؤرخ محترم يكتب مش واحد حشاش ..  
 نيجى باه للفيلم الرائع الناصر صلاح الدين اللي عمله أحمد مظهر بمعلمة  
 الفيلم عشرة على عشرة

لكن لما يطلعلى واحد مسلم اللي هو عيسى العوام انه مسيحي علشان الوحدة الوطنية يبأه ده تزوير لوعى الامة .. حلوة وعى الامة دى

يعنى يوسف شاهين من جبروته خلى واحد مسلم مسيحي علشان الوحدة الوطنية والفيلم يمشى ويعدى ويبأه كله تمام ... وأحنا معندناش مشكلة مع حد لكن بدل اننا بنتكلم عن فيلم تاريخى يبأه انا عاوز اتفرج على تاريخ حقيقى مع حبكات درامية لا تخل بالمادة التاريخية (( أنا

بقول كلام كبير))

عموما .. أنا ضد دخان الحشيش يوصل للتاريخ

وعاوزين شعب فايق ، علشان كل مؤرخ حشاش بيكتب قبل ما يتنيل ويكتب يسأل نفسه سؤال

لما احب أحشش مع شعب مصر

أحشش مع مين!

## لو مد قالك فى الشارع إنت ديما جوهي دي تبأه شتيمة

### ولا حاجة ملوة !! ..

أجدع حاجه عندنا فى مصر إن لما فيه فكرة بتنجح تلاقي مليون واحد عمال يكررها حتى ولو كانت الفكرة دي خلاص فقدت بريقها .. يعنى لما ظهرت فكرة محلات (النت كافيه) بأه خلاص فى الشارع بتاعك خمسة أو ستة محلات نت كافيه... ورغم انه بدأ كمشروع مربح إلا أنه دلوقت مباحس زى الأول .. ولما طلعت فكرة البطاقة الصحية العائلية اللى بيعملها مجموعة دكاترة مع بعضهم من مختلف التخصصات ويوزعوا البطاقات دي على المنازل مقابل مثلا ١٠ او ٢٠ جنيه ثمن البطاقة فى الوقت اللى ممكن اى حامل للبطاقة دي يكشف عن أى دكتور منهم من أى تخصص مقابل نص الكشف فقط حقق المشروع ده فى بدايته أرباح رائعة لكن دخل فى العملية مجموعات تانية كثيرة حاولت تقليد الفكرة مما أفقد المشروع ربحيته..

وبرضه لما كانت الموجه فى التسعينات المجالات والجرائد الثقافية واللى مهتمة بس بقضايا الجنس وتلاقي كده عند بتاع الجرايد الصور العريانة مهفهفة على أغلفة المجالات والجرايد والعيال المراهقين شغالين شراء على ودنه كانت مبرحه ليهم ومع الوقت ومع انتشار الكمبيوتر وكله اصبح على عينك يا تاجر واصبح كثير من المراهقين مكبرين دماغهم من المجالات دي ومع إنتشار موجه المعارضه السياسية حتى اصبحت الجريدة الاكثر معارضه هى اللى بتبيع أكثر فى ضوء ده كله تحولت كثير من الجرايد الصفراء الجنسية إلى جرايد سياسية معارضه .. وبدل ما كانت الصور العريانة بتصدر الصفحات الاولى اصبح الهجوم السياسي هو البديل ..

العملية بس أولا واخيرا بزنس ولو دقت النظر كده فى جريدة مشهورة جدا فى المعارضه وبصيت لى بيمولوها حتلاقيهم كلهم رجال أعمال ليهم مصالحهم وهم جزء لا يتجزأ من النظام اللى بيهاجموه .. وخذ عندك كمان برامج التوك شو لما نجح أول برنامج توك شو طلع عندنا بعدها إثنين وتلاته وأربعه وكله فى الاخر لك على عك وصداع فى صداع ولا يقدم ولا بياخر .. اصبحت برامج التوك شو مسرح لى عاملين نفسهم مثقفين لإستعراض عضلاتهم فى إستخدام الفاظ مجعلصه يعنى فى احد البرامج الحوارية الساخنة كانت فى اتنين بيتناقشوا أو بمعنى اصح بيتعاركوا والمذيع واقف لا يص وعمال يقول لده (سوف اعطيك المجال) ويهدى فى التاني ويقوله (سوف اعطيك المجال) ، لكن لا ده بيسمع ده ولا التاني معبره ، ومع إستناد

المعركة الكلامية بين الاتنين واحد منهم قال للثاني (إنت ديهاجوجي) ، فالثاني رد عليه بسرعة وهو منفعل قايله (ده انت اللي ديهاجوجي وستين ديهاجوجي) .. يا نهار ابيض يا ناس (ديهاجوجي)!! ..دى العالم دى بتشتتم بعضها بالثقافة .. طب اللي قاعد قدام التلفزيون ده حيسأل نفسه (إيه ديهاجوجي دى يا خويا!) ..

الناس دى بستعرض وخلص هي شغلتها كده اللت والعجن من غير ما يستفيد عامة الناس منهم بحاجه .. فالديهاجوجية لاتينية فى الاصل بيقولوها على اللي بيستخدم الشعارات والحيل السياسية لخداع الجماهير .. طب عم جابر وعم متولى والناس البسيطة دي اللي قاعده قدام التلفزيون علشان تخرج بحل لمشكلة فى حياتها او تعرف اللي بيجرى حواليا حيعرفوا المصطلحات العقيمة دي منين .. العملية كلها أصبحت بزنس توك شو أو حتى جرايد .. فخلى بالك بأه لو حد قالك فى الشارع انت ديهاجوجي دى كلمة وحشة مش حلوة وطبعاً جنابك عارف حترد عليه بإيه حتقوله (انت اللي ديهاجوجي وستين ديهاجوجي).



والحبشكنات والكلام الحمصى الى حيقوله ، يقول ((فأخذ الشيخ إحليل نفسهأي: ذكره -  
بيديه الاثنتين من تحت إزاره فطال طويلاً عجيباً بحيث إنه رفعه على كتفه ، وهو زائد عنه، وصار  
يجلد به خادمه المذكور ، والخادم يصرخ من شدة الألم ، فعل ذلك مرات ثم تركه ، وعاد إحليله  
إلى ما كان عليه))

اه يا عالم يا ملاحيس .. حكايات موالد ومصاطب صحيح !!  
حبكت يعنى معهوش عصاية ولا خرزانة أو كان اسهل يديلو شبشبين  
معلش اصبر عليا واستنى بأه .. لان دى حكاوى عاوزه قعدة  
والراجل معجب اوى بحكاية واحد عريان .. ويقولك الشيخ إبراهيم العريان رضى الله عنه ..  
وبص بأه يقولك ايه وكان رضى الله عنه يطلع المنبر ويخطب عريانا ..  
ايه يخطب عريان دى متعرفش ، يمكن الجو حر شوية بس متوصلش انه يطلع يخطب عريان  
كان يقعد فى بيتهم احسن ويشغل التكييف أو المروحة مش فارقة  
الواحد بيقرأ الحاجات دى ومش مصدق ، ان فيه ناس عقلها بأه ترالى للدرجة دي  
وبالنسبة للخزعبلات  
نيجى برده لحكاية تانية متعرفش بتوع الموالد وراها ولا اصحاب ماكينات التصوير  
تلاقى وانت ماشى فى الشارع واحد بيوزع عليك ورقة .. تقرأ الورقة ..  
(( السلام عليكم انا الحاج أحمد أبو مش عارف ايه وأنا كنت نايم فى الروضة الشريفة جالى  
الرسول فى المنام وقاللى يا أحمد الامة حالها هباب وأنا  
مش راضى عن الحال .. ))  
بعدين عم أحمد ده يقول ايه  
(( واللى مش حيوزع الورقة دى ويصورها عشرة نسخ حتصيبه بلاوى وكوارث ففلان الفلانى  
رماها حصله كذا وعلان العلاني حصله كذا ))  
ولا انت عارف مين الحج أحمد ده ولا يجزنون  
وبعدين مين الحج احمد ده اصلا مجهول الهوية الى الرسول صلى الله عليه وسلم يجيله علشان يبلغ  
عن طريقة رسالة للأمم ؟ !!

لأوشوف .. وهو كان نايم فى الروضة .. يعنى الروضة الشريفة اللى الناس بستنشق فيها على  
شبر فاضى علشان يصلوا ركعتين ومش لاقين ، عمنا الحاج أحمد كان نايم فيها وبيحلم كان ..  
يعنى كلام كله خزعبلات واصحاب ماكينات التصوير كانوا وراء العملية أو الله اعلم مين تاني

فانا مش عارف بصراحة ايه اخرة الخزعبلات دي  
ولمصلحة مين تطلع حكايات عبيطة ومربية زى دى

بجد

أصحاب العقول

فى راحة.

## يا مركبي سيرى فى طريقك ولا تفاقى الرياح لو فيه ضلام

### فى الوجود قلبي أنا ملاح

فى فيلم ( كلمة شرف ) بتاع وحش الشاشة فريد شوقى .. ولما كان مسجون وبيكلم رئيس السجن اللى هو كان ( أحمد مظهر ) بعد فشل محاولته للهرب خارج أسوار السجن ، قاله ( دى مش اول مرة أحاول فيها الهرب ومش حتكون آخر مرة ) .. تقريبا ده هو نفس الكلام اللى قاله أحد الناجين من الغرق من بتوع الهجرة غير الشرعية واللى كانوا حيغرقوا على شواطئ إيطاليا .. ورغم أن واحد من الناجين دول سبق له قبل كده انه سافر برده هجرة غير شرعية وكان حيغرق وانقذوه وحاول لتاني مرة وتكرر نفس السيناريو .. إلا أنه مصمصم إنه يصل لشواطئ إيطاليا أو الموت دونها .. وبيقول دى مش اول مرة ومش حتكون اخر مرة .. إيه الاصرار ده اللى ممكن يخلى إنسان يجاذف بحياته .. يعنى انت لو عاوز الدقة ايه الرغبة فى الانتحار دي .. حتى انه وضع الحياة فى إيطاليا فى كفه والموت فى كفه تانية .. مين اللى وصل الناس للحالة الهباب دي .. الحالة اللى خلتهم يهجروا بلادهم حتى لو كانت فى الهجرة دي موتهم .. مين المسئول عن الوضع ده ..

هو ده السؤال اللى إستطاعت ( قهوة جمالات ) وفى انفراد ساحق فى عالم التدوين أن تحصل على اجابته من مجموعة من النخبة الفكرية فى عالم العربي .

فى البداية سألنا ( سعيد كوباية ) الخبير فى شئون شحن البنى آدمين وتفرغهم .. فقال )) : الحقيقة يا جماعة إن إسرائيل هى السبب ، هى اللى غرقت المراكب بتوع العيال دول على شواطئ إيطاليا علشان تبيع الرأى العام العربي ضد حكوماتهم )) ولما حاولنا نستفهم من عم ( كوباية ) عن مين تحديدا فى إسرائيل وراء حكاية غرق المراكب دى قال بكل حماس (( بن جوريون . )) أما استاذ ( عوض نظرية ) المسئول الرفيع عن وضع الخطط والنظريات لشئون الهجرة فقال بكل صراحة : (( المسألة محتاجه نظرية والعيال دول سافروا من غير نظرية محددة يمشوا عليها علشان كده النظرية بتقول ان من يمشى بدون نظرية لازم تكون نهايته فى المهلبية ))

أما رجل الاعمال الشهير ( أبو الهدد ) بتاع فيلم ( الراقصة والطبال ) قال ردا عن سؤالنا : (( شعارنا من هد وجد ، شوف يا أستاذ لازم تهد علشان تبني ، والبلد مليانة شباب خليها تخف

وده رزق السمك اللي في البحر ، شغل دماغك أمال))

ومن حسن الحظ اننا وجدنا عند ابو الهدد الست ( زكية سوسته ) الرقاصه اللي اعلنت إستيائها بكل صراحة من اللي بيحصل وقالت (( شوف يا دلعي اللي بيحصل ده ميرضيش حد ، يعنى هما الستات بتوع إيطاليا دول بيعرفوا يرقصوا أحسن مننا ، كده الشباب بتوعنا ينحرف ، على الاقل احنا بنرقص بترخيص))..

بعد كده نزلت ( قهوة جمالات) إلى الشارع علشان تستطلع رأى عامة الشعب في اللي بيحصل ولكن للأسف الشديد فشلت جميع المحاولات في اخذ كلمة من المواطنين أو محاولة إستطلاع رأيهم .. فـ ( زكى زُمارة) صرخ فينا لما حاولنا إننا نسأله وقال: ( ناس معندهاش دم ده وقت أسئلة وهباب مش شايفنى متلقح في طابور العيش بقالى ساعة ) .. حاولنا أننا نطلع من طابور العيش بعد جهد جهيد لنجد رجل في أوائل الثلاثينات قاعد على الرصيف قدام الفرن وعينه شاردة ومش مركزة في حاجه معينه .. اقتربنا منه في حذر وفي توتر سألناه (( إحم إحم .. احنا بنعمل تحقيق على الشباب الغارق على شواطئ ايطاليا بتوع الهجرة غير الشرعية .. تفتكر ايه السبب في هجرة الشباب دول وايه الحل اللي تقترحه )) .. لم يرفع الرجل نظره لي وظل شارد النظرات وهو يهمهم في شىء أقرب للهمس أغنية العندليب ((يا مركبي سيرى في طريقك ولا تخافى الرياح لو فيه ضلام في الوجود قلبي أنا ملاح))

ثم رزع دمعتين.



ضغط على حبيبها لو ملاقتش منه غير الجفاء او الخصام في يوم من الأيام ، ولأن الست تدافع عن حبها بكل ممكن ومستطاع ولأن منهن اللي مش بتعبأ بمشاعر الناس فقد توهم الحبيب من طرف ثالث انها اخيرا حبته ويطلع في الاخر إنها لا حبته ولا شىء وإنه مكنش غير لعبة وانتهى فيها دوره.

رابعا : حتى لو الحبيب من طرف ثالث إستطاع إنه يفوز بحبيبته ويفرق بينها وبين من إرتبطت به .. حيكون هناك بذور للشك داخل نفسه مستتية الوقت المناسب لتنتب .. فالبنت اللي باعت اللي حبته علشانه ايه اللي يمنع إنها تبعه هو كمان في يوم من الايام .. وهكذا حتلاقى كل تصرفاتها مصدر للشكوك من ناحيته.

فاللي بيعب من طرف ثالث نهايته أندله وحياته حتكون بهدلة .. وبعدين يا رجاله عاوزين نتكلم بصراحة ليه الراجل في الحب ده يتنازل حتى ولو على حساب كرامته ! إيه اللي يدفعه لشىء زى ده ! ..هل مثلا من اجل السعادة ! .. يبأه غلطان لأن السعادة في الحب لا تكون إلا إذا كان الحب متبادل .. ولو واحدة اتجوزت واحد علشان يكون (ضل راجل ولا ضل حيطه) ازاي هي حتقدر تعطى الراجل السعادة اللي هو عاوزها ..ولو سعى الراجل وراء الوهم ظننا منه إنها يمكن انها تحبه بعد كده يبأه بيلعب على حاجه في علم الغيب وحتتحول علاقته بها إلى إستجداء الحب ..وده بيحصل لقناعة عنده انه مش حيقابل تاني وحدها زيها يجبها أو في جماها أو في أخلاقها .. وده برده إعتقاد خاطيء لأن طالما الانسان بين ضلوعه قلب يبأه يقدر يجب مرة واتنين وممكن ان تقابله محطات الحب الحقيقي أكثر من مرة.

## الضرب فى المدارس

بعض الناس كان يفكر ان الضرب بس بيكون فى مدارس الحكومة على أساس إنها معنى معاقل التعذيب ، وكانت العيال عندنا فى الشارع بتحسدني علشان أنا كنت فى (مدرسة خاصة) وإيه يا باشا لغات كمان.. يعنى القر شغال على ودنه.. والكلام ده كان فى فترة التسعينات اللي كانت فيها مدارس خاصة يعنى إنسى يا معلم.. ولتتعرف الفرق فى وقت كانت المدارس الحكومى دى ٣ فترات ( صباحي ووسط ومساءلي)

وفترة الوسط دى اللي فترة مسخرة بجد كان الطالب يروح المدرسة الساعة ١٠ الصبح ويطلع الساعة ١ ظهرا، اخر رواقه كأنه داخل حفلة سينما موش مدرسة..

لكن اللي مكنتش يعرفه حد إن المدارس الخاصة كان فيها ضرب وضرب بإفتراء كمان بعكس دلوقت اللي فيها الطالب باشا!!!!!! ويمكن ياخدله الكابتشينو بتاعه كمان فى الحصص..

فجأة ماما لاقتنى بقولها انا موش عايز أروح المدرسة تانى

وبعد ليه يا وله وإنت هببت إيه قولتلها إن ميس (صفاء) عقدتني فى عيشتي من الانجليزى واللى بيدرسوه ، وميس صفاء دى اخوانا لما اقعده أقيمها دلوقت بعد سنوات النضج أقدر أقولك بكل ثقة إنها (معقدة نفسيا) ..

متعرفش ليه بس هو ده الحاصل..ويمكن هى المدرسة الوحيدة اللي كانت بتمارس التعذب النفسي والجسدي على الطلاب فى وقت واحد ، وكأنا فى مدرسة هتلر الابتدائية بنين يمكن مكنتش بتتقاعس عن تأديب اى حد ينسى كراسة الواجب أو حتى معلمهوش بكام عصاية حلوين لكن هى كمان كانت تمارس السخرية من اللي مكنتش بيعرف يجاوب (وليه متعقدة بعييد عنك) .. وهكذا فضلت قاعدة زى ابو الهول على قلبونا فى الفصل لغاية ما السنة انتهت وغارت فى غير عودة بعد ما عقدت الفصل كله فى الانجليزى وسنينه السوداء.

كان برضه عندنا مدرس الحساب وده برضه كان متعقد فى عيسته..معقد نفسيا برضه .. وحاجه غريبة انى كنت موعود بمدرسين متعقدين نفسيا ..

يعنى مدرس الحساب ده موش فاكر اسمه كاملا لكن فاكر انه كان اسمه حاجه كده الطوخي بس كان متعقد فى حياته اخر تعقيد لما كان بييجي يضرب عيل فى الفصل كان الاول بيرميطة حاجته على الارض يعنى لو شاف كراسة او قلم أو ..أو ..على التخته يقوم بالمسطرة مطيرها ع

الأرض بعدين وكيف الطالب بعاصيتين حلوين ..

وهنا قررت انى أنزع سيفى وإستغل عقلى الصغير وقتها فى حيلة تعيشنى ملك فى الفصل .. بعد لما اخدتلى عصائتين معتبرين رحى البيت طبعاً وانا بعيط وكانت ايدى حمراء وانا زودت فيها شوية دلج بعدها قرر والدى انه يعمل محضر للمدرس ده فى القسم ، وبالفعل تم والمدرس اتوسل وقلب قطة علشان والدى يتنازل عن المحضر ومن بعدها عشت باشاااا فى الفصل واللى حصل سمع كله المدرسة ..

وبعد حديث الذكريات ده

تعالوا أقوللكم إن اغلب الشخصيات المصرية لما تحس انها فى إيدها سلطة بتفتري خصوصاً فى عدم وجود اللي موش اللي يقولها انتى بتعملي إيه! أنا شايف إن الضرب فى المدارس بالطريقة اللي بتحصل واللى كانت بتحصل دى طريقة همجية لعلها لم تخطر فى بال هتلر لتعذيب المعتقلين فى معتقلات النازية تقريباً كل شخصية فى مصر سواء كان سياسى كبير ولا مثقف ولا حتى رجل بسيط كلهم إنضربوا فى المدرسة حتى الشيوخ الكبار انضربوا فى الكُتاب وهم صغيرين لكن ضرب عن ضرب يفرق .. وهنا مربط الفرس ولكن نظراً لاننا فى زمن معدش فيه تفريق بين ضرب وضرب فاصبح المنع هو الحل لازم نمنع الضرب ده فى المدارس طب حد يقولك كده الطلبة يركبوا المدرس ويصبح شعارهم المفضل ( قوم للمعلم وفيه التلطيشا كاد المعلم أن يكون شوايشا ) أقولك ان دى ممكن تتحكم بقرارات إدارية ممكن تتخذ ضد اى طالب يتجاوز فى حق معلمه وبكده اى طالب ممكن يخاف من اى قرار اداري لو تجاوز وهكذا .. نلغي حكاية الضرب ونحفظ للمعلم برضه هييته.

## غلبت اصالح فى رومي

كثير من البشر ييحبوا الى يئخدعهم وأحياناً الى يبيكون صريح معاهم بيكون غلطان فى موقفه ده .. يمكن كلامي ده ينطبق على سؤال مهم وهو لو فيه بنت كانت بتحب شاب ومتفقين على الجواز والعملية انتهت بدون اى تجاوزات حدثت بين الطرفين هل من المفترض ان البنت تحكي القصة دى كلها للزوج المتقدم لها ولا لآ؟! .. وقبل ما نجاوب على السؤال ده تعالوا أحكلكم قصه من دراما الحياة لبنت كانت تحب شاب زميل لها فى الجامعة ثم تقدم لها هذا الشاب بعد التخرج وكالعاده ابوها رفض الشاب ده لأن ظروفه المادية كانت مش ولا بد حبيتين .. بعدها بفترة تقدم لها واحد قريبها ووافقت عليه ولكن قبل ما تتخطب له قالت له انها كانت بتحب شاب وكانوا متفقين على الزواج وانتهى كل شىء ، فسألها إن كان حصل بينهم اى تجاوزات، قالت له لآ قالها وأنا موافق وتمت الخطبة والزواج وخلفوا عيل زى العسل .

ورغم ده فضلت فى نفس الراجل بذور الشك انها لسه بتحب الشاب ده رغم ان مفيش اى دليل على شكه ده .. وفى يوم كان الراجل ده هو زوجته وابنه فى النادي وقابلت واحده زميلتها من ايام الجامعة ولما سألتها عن اسم ابنها قالت لها فلان ، فإيتسمت الصديقة فى خبث لان ده نفس اسم الشاب الى كانت بتحبه قبل كده ، وطبعا الزوج لمح ده وفهم ولما رجعوا البيت بدء الاستجواب وبكت الزوجة من ضغط الزوج عليها وقالتله انها موش هى الى اختارت اسم ابنها وانه هو - اى الزوج - الى اختار اسمه ، طبعا الزوج اندهش لكن واصل عناده وقال كان المفروض ترفضى ان اسمى ابني بالاسم ده وكبرت المشاكل بينهم بسبب الموقف ده .

هى دى الحكاية ونرجع لسؤالنا هل من المفترض ان البنت تحكي قصة حبها للزوج المتقدم لها ولا لآ؟! أم ان الحكاية دى بتعتبر من الماضى الى موش من حقه انه يعرفه طالما محصلش فيه حاجه غلط؟! وفى قصتنا دى كانت البنت صريحة جدا وقالت كل حاجه للزوج المتقدم وانها خلاص موش بتفكر فيه وهو وافق وقبل صراحتها يبأه على اى أساس يفضل معيش نفسه فى نكد وهم وحنن ووسواس ! لو مكنش قد الموافقة مكنش وافق من الاول .

بعدين نظر للبنت وصراحتها ونحترم فيها ده كله والاهم إننا نتعامل مع المرأة إنها كائن حي لها قلب من حقتها انها تحب فى أى مرحلة من حياتها وموش ممكن نيجى نحاسب المرأة على ميل قلبها طالما لم تخالف الأصول ، هل من الممكن انى أروح علشان أتجوز واحدها وأحاسبها علشان

حبت قبل ما تعرفني! لو عملت كده أكون ظالم لها ، هي من حقها تحب لكن مفتاح القضية دى هل هي نست حبها القديم ولا لسه عايشه في دايرته المغلقة؟! بطله حكايتنا أغلقت ملف حبها القديم وصارحت المتقدم بده وده دليل على انها حسنة النية أما زوجها فرغم انه وافق فهو منساش للحظة اللى حكتهوله وظل عايش في الوهم ده من قبل حتى ما يقابل صحبتها لدرجة انه نفسه نسى انه هو اللى سمى الولد بالاسم ده موش هي ، لكن علشان الوسواس مسيطر عليه عاند وقال كان المفروض انها ترفض الاسم ، وهو منطق غلط أساسا لان اعتراضها على الاسم دليل على انها منستهوش وانه حيدكره بيها وحيزيد شك الزوج اكثر لكن ده دليل انه موش فارق معاها.

دى قصة من دراما الحياة تخلينا نتساءل هل من المفترض ان البنت تحكي قصة حبها للزوج المتقدم لها ولا لآ؟! أنا شايف وبكل أمانه إنها لا تحكي ، طالما أولا هي نست الحب ده، ثانيا مكنش فيه تجاوزات ، ثالثا لو هو مسألهاش ، وأنا موش شايف ان ده فيه خداع لان أى إنسان له قلب ومشاعر ممكن يحب ويتحب وده في حد ذاته موش عيب لكن العيب انه ده يقترن بالغلط ، لكن طالما الانسان مغلطش ليه يعيش في دائرة ( غلبت اصالح في روعي) على مشاعر نبيلة الايام نهتها ، أعتقد أن الامور دى ونظرتنا ليها بتختلف من شخص للتاني وأحب أسمع اراءكم فيها.

## يا من تطلب المدد من الميتين إبقى قابلني لو كانوا

### سامعين

لو رجلك خدتك لأي مسجد فيه صريح بكل ثقة أقدر أقولك أنك حتشوف العجب .. وأنا شخصيا حدث لي موقف من دول من ٤ سنين .. كنت ماشى على البحر مع احد الاصدقاء وسمعنا أذان المغرب من أحد المساجد الكبرى اللي على الكورنيش عدل .. ولا أخفيكم قولا مكتشش أعرف إن المسجد ده فيه صريح .. حتى إنى دخلت وصليت ولم ألاحظ وجود الضريح لانه كان في أوضة جانبية .. المهم إنتهت صلاة المغرب فأسرعت علشان ألبس الحذاء لكن لفت نظري دخول ناس إلى أوضة جانبية وخروج ناس منها .. قوت في نفسي ايه الاوضة دي ! .. فقوت لما ألقى نظرة .. بصيت لاقيت ضريح كبير متوسط الأوضة ... وناس حول الضريح اللي متعلق وماسك في أسوار الضريح واللى بياخذ له لفه حول الضريح .. حاجات تخلى العقل الطاير يشت .. والغريب أن الناس دي منظرها بيوحى إنها متعلمة .. خرجت من الاوضة دي وإرتديت حذائي ثم خرجت من المسجد وأنا مازلت افكر في اللي أنا شفته ...

ثم السؤال اللي طرح نفسه مين الناس دي اللي عملوها ضريح واللى أطلقوا عليهم أولياء الله الصالحين ! .. مين مثلا (المرسى او العباس) و(سيدى بشر) في الاسكندرية؟! .. ومين (البدوي) اللي في طنطا؟! .. وهل كانوا فعلا أولياء أم لا! وما هو حقيقة تاريخهم ..! ، إذا كانوا على فرض أولياء هل يصح دفنهم داخل المساجد والاهم هل ما يفعله الناس دي بالاحرحة يمت للأسلام بصلة؟ ..! وبعد طول تفكير وصلت لقناعة أن كل ما يحدث ده إستخفاف بالعقول فهو يناقض الشريعة والعقل معا .. فما فمعنى مثلا إنى أدخل أنادى واحد ميت وشبع موت وأطلب منه أن يتشفع لـ فلان أو يقضي لعلان مصلحة معينة .. فلو أنت متخيل ان الملقى أمامك ده جثة هامدة بيسمعك يبأه عليه العوض في الربيع النافع من نفوخك ، ولو تخيلت أن الجثة اللي قدامك دي ممكن تقضي لك حاجات يبأه عليه العوض في نفوخك كله ومحتاج نفوخ جديد لسه بكرتوته .. فده وضع غريب مناقض للفطرة وللعقل ..

لكن محدش مثلا قعد يفكر هل (المرسى أبو العباس) ده يستحق أنه بينى له ضريح فضلا عن الحكم الشرعي في بناء الضريح ! .. مين مثلا منهم أو أى حد فكر انه يتأمل في أقوال الاولياء دول ويحكم عليهم منها .. ! فمثلا أحد اللي بيسموهم اولياء وله ضريح مشهور في الاسكندرية

يقول : (ما من وليّ كان أو هو كائن إلا أطلعني الله عليه وعلى اسمه ونسبه وحظه من الله تعالى )  
 (معراج الشوف لابن عجيبة: صفحة ٨٨) .. طب بالله عليك لو حد طلع الايام دى قال الكلام  
 ده حتعمل فيه ايه؟! .. مش بعيد ترقيه بكرسي في دماغه .. إزاي يكون قائل الكلام ده ولي وهو  
 عمال يخترع ويسرح بخياله .. أيوه للأولياء كرامات لكن فيه حدود .. فعلم الغيب ده اختص الله  
 به نفسه ، مينفعش يكون من كرامات ولي علم الغيب ومينفعش يقول ان الله سبحانه وتعالى هو  
 اللي اطلعني على الغيب لان الله تبارك وتعالى قال في آيات في القرآن إنه اختص نفسه بعلم الغيب  
 ... بيأه موضوع الاضرحه ده يجعلنا نطرح سؤال مين اللي في الضريح ده وايه تاريخه؟! .. أما  
 الفكرة العامة نفسها اللي هي اصل الفطرة ان المسجد منفصل عن القبر ده شىء بديهي مش محتاج  
 أى فذلكة عقلية للوصول إليها ..

بيأه ايه المبرر حتى ولو سلمنا ان دول أولياء اننا ندخل قبورهم في المسجد .. فالصحابه وهم  
 أشرف الخلق بعد الانبياء محدش فكر انه يعملهم ضريح والسبب في ده ان وفاة الصحابة كانت  
 في فترة الدولة الاسلامية كانت فيها قوية العقيدة ومدبتش فيها الخرافات والخزعبلات .. ولو  
 بصيت فعلا للأضرحه المبنية دى حتلاقيها طلعت إذ فجأة كده في عصور التخلف والضعف  
 وخصوصا في فترة الدول العثمانية .. من السهل جدا إننا نضع حد لكل المهارات دى اللي  
 بتحصل حول الاضرحه لكن اصبح هناك ناس متتفعين فعلا من بقاء الحال على ما هو عليه ،  
 وصناديق النذور شغالة على ودنه ، وبتوع الموالد شايفين فيها سبوبة ولقمة عيش حلوة وسلملى  
 على وعي الامة المفقود.

## دماغك متوافقة مع مين؟!

كلنا عارفين حكاية ( قلب الام ) وان قلبها دالها .. وأن مثلاً لو ابنها فرحان بتحس ولو زعلان بتحس .. وتحس كده مثلاً لو ابنها زعلان وهو بعيد عنها او حصله حاجه تقولك ((اصل قلبي مقبوض )) مع أنها لسه معرفتش ايه اللي ممكن يكون حصل لابنها.

أنا شخصياً كنت من الناس اللي لما يشوف حاجه زى دى فى التلفزيون أقول ده شغل افلام عربي .. لكن لما سألت حالات واقعية من امهات مرت بالحكاية دى عرفت ان فعلاً الحكاية دى حقيقي .. ده مش بس كده يا معلم ده انا عرفت ان الحكاية دى ممكن تحصل مع اى اتنين مرتبطين ببعض جامد .. مش لازم يعنى يكون ام وابن .. يعنى مثلاً مثلاً أحياناً انت كده مش بتروح مكان معين خالص بعدين طلعت فى دماغك انك تروح المكان ده علشان تشوف واحد حبيبيك او حبيبتك رغم انك عارف انه مش بيحبي المكان ده اصلاً أو صعب تلاقيه موجود .. وبعدين تلاقيه فعلاً حضر وتشوفه .. ولما تسأله او تسألها انتي جيتي هنا ليه يا موزتى .. تقولك مش عارفه بس كنت حاسه اني ممكن اشوفك هنا ..

فدى برده حكاية بتحصل مع ناس يمكن مش بنفس الصورة السابقة الى حبيت اقربلك يعنى المسألة بيها .. بس بيكون فعلاً بينهم نوع من الارتباط العقلي متعرفش ازاي .. بس لو تلاحظ معايا برده تلاقي الحكاية دى بين اتنين متعلقين ببعض جداً ..

قولت لما اشوف الحكاية دى كده على النت يمكن نطلع بحاجه مفيدة .. لاقيت بأه علماء النفس شغالين كلام فى الحكاية دى .. وتحس وانت بتقرأ كلامهم بحاله من اللسان لانك مشتغرب العملية مش اكثر رغم ان ممكن يكون كلامهم صح .. فيقولك لتفسير الظاهرة دى أن الأفكار تنتقل من خلايا المخ على شكل موجات كهرومغناطيسية سرعة ستين ألف كم فى الساعة حيث يتم استقبالها لدى الأشخاص الذين تكون موجات دماغهم متوافقة مع موجات دماغ المرسل .. المرسل، يعنى اللي بتكون أرواحهم وأفكارهم على توافق كامل معها بعدت المسافات فيحصل توارد وتزامن فى الأفكار لدى الشخصين يعنى التخاطر يحدث بين المتحابين والأصدقاء المقربين

فها يا باشا .. انت دماغك بأه متوافقة مع مين .. أنطق وقول .. جولى ولا تخبيش يا زين ..!

## لو لاقيت مد فى الشارع شعره منكوش واعور يباه أكيد

### مش المسيح الدجال !!..

تجد الناس فى وقت الأزمات وهروبا من الواقع يفتشوا فى النبوءات الدينية ويعملوا لها إسقاطات على الواقع .. والمشكلة ان الاسقاط ده مثلا مش راجع لدلائل عندهم لكن هم هروبا من ازمة ما يفتشوا فى النبوءات ويطلقوا لخيالهم العنان .. مباح حتى فيه ضوابط معينة عند الكثير من الناس فى التعامل مع أسراط الساعة .. وحيث إننا شعب إشاعنجي طلع الناس الفاضية إفتكاسة غريبة وانتشرت فى فترة من الفترات بتقول ان المسيح الدجال ظهر يا ناس فى الهند أو باكستان .. طب هو فين يا معلم .. يقولك ده نزل ومش لاقينه .. وانا مرة سألت واحد ايام الاشاعة الغربية دي وقولتله يا راجل بأه الدجال ظهر فى الهند أمال لا حس ولا خبر يعنى .. قاللى اصله مش لاقينه ده بيجرى وهم ييجروا وراه .. ومش عارف بصراحة ايه العقول دي .. يعنى هو بيتكلم على أساس ان الدجال نازل يلعب معاه إستغماية .. كلام حتى يفتقد للفهم الصحيح لاشراط الساعة .. يعنى أى حد دلوقت ماشى فى الشارع شعره منكوش واعور مش بعيد تلاقى الناس بتجرى وتقولك الدجال اهو .

حتى مثلا جريدة من الجرائد نشرت خبر عن ام فى احدى البلاد الاسلامية غير العربية (( مش متذكر إسمها )) قتلت ابنها علشان فاكهه ان ده هو الدجال .. وهى بكل فخر بتقول انا ريحت الامة الاسلامية من شره .. والسبب دى بكل صراحة ملهاش فى البطيخ يعنى حتى مثلا لو ابنها الدجال هى قطعنا مش حتعرف تقتله .. كونها قتلته يباه أكيد مش الدجال .. لان الثابت ان المسيح عيسى بن مريم عليه السلام هو اللى حيقتل الدجال فى فلسطين .. فالحاصل ان الناس مش فاهمه أسراط الساعة ونبوءات آخر الزمان .. وهربت من واقعها المر بكل اللى فيه من بلاوى وقاعدة مستنية المهدي وعمله تتساءل فى الدجال .. احنا بنؤمن بالثابت قطعنا بالقرآن والسنة .. نؤمن ان فيه المهدي .. ونؤمن إن فيه الدجال .. لان كله ده ثابت فى الصحيح .. لكن متبأس دى شغلاننا .. ونبطل نفكر فى حلول لمشاكلنا مستنيين المهدي .. كثير من الناس بسبب الاحباط هربت من الواقع إلى الغيب .. وفيه مجموعة تانية بيستغلوا النبوءات وأحداث آخر الزمان لتحقيق مصالح ومكاسب سياسية زى مثلا اللى يكلمك عن معركة (هرمجدون) .. وتلاقى

الارصفة في الشوارع مليانة بكتب تتكلم عن معركة (هرمجدون) .. ولو انت مثلا قلبت كتب السنة بطولها وعرضها وأحاديثها صحيحها وضعيفها مش حتلاقي لفظ (هرمجدون) ده إطلاقاً .. لان اللفظ ده اصلاً مش لغة عربية ده لفظ (عبري) .. والمعركة المزعومة (هرمجدون) عند اهل الكتاب حتكون في اعتقادهم بين قوى الخير اللي هما طبعا في اعتقادهم النصارى .. وقوى الشر اللي هما طبعا في اعتقادهم المسلمين ..

يبأه اصلاً (هرمجدون) دي معركة وهمية مخترعة .. لكن الصحيح أن فيه معركة في اخر الزمان فعلاً كلمنا عنها الرسول صلى الله عليه وسلم إسمها (الملحمة) وهى بين المسلمين وبين الروم .. الروم الان هم أوروبا .. وحيثتصر فيها المسلمون وتفتح بعدها أوروبا كلها ثم ظهور الدجال وتتوالى أشراط الساعة .. فمن الخطأ البين أننا نخلط بين فكرة مزعومة وهمية وهى (هرمجدون) وبين حقيقة ثابتة أخبر عنها الصادق المصدوق صلى الله عليه وسلم وهى (الملحمة) .. ونرجع لكلامنا عن إسقاط النبوءات على الواقع .. وأتذكر أنه في إحدى خطب الجمعة أيام ضرب الامريكان للعراق وهروب صدام حسين .. أن شيخ الجامع ذكر في خطبة أن صدام حسين هو (السفياي) .. واصر على رايه وحاول بكل ممكن ومستطاع أن يثبت رايه ده .. رغم إنى برجوعي لعلماء الحديث قالوا لي كل الاحاديث بتاعة السفياي لا يصح منها شىء .. يبأه السفياي ده كمان مش نبوءة .. والحاصل إن الناس اللي بيعجبوا يعملوا اسقاط للنبوءات على الواقع بدون دليل اخدوها كده من غير حتى ما يتأكدوا من الكلام صحيح ولا ضعيف .. ويبدو أن صدام حسين كان واخذ حقه من الاسقاطات اللي وقعت عليه مش بس من العرب لا كمان من الاوربيين فمثلاً بعد الغزو العراقي للكويت عام 1990 م طلع اليمين النصراني إشاعة إن (صدام حسين) هو المسيح الدجال اللي حيدعنه الروس في الحرب على إسرائيل.

## رغم ان زيتهم بأه فلاص فى دقيقتهم لكن اطمئن فلن

### تتلولو ولن نتلمع ولن نتبمع !!

على طريقة إمتحانات الثانوية العامة أقصد العامة أطرح عليكم سؤال للمتفوقين .. والسؤال هو هل هناك علاقة بين الإقتصاد والأخلاق؟! .. أو بين السياسة والأخلاق؟! .. طب تعالى نخلط كله ببعض ونعمل شأى بلبن ونقول إقتصاد فى السياسة أو سياسة فى إقتصاد هل لهم علاقة بالأخلاق!!

(نورينا هيرتس) هتجاوب على السؤال ده .. و(نورينا) مش إسم ممثلة من اللى بياخدوا ٢ مليون فى ٣٠ حلقة من مسلسل هابط وملل .. ولا هى دكتور فى جامعة بتدي رسائل من ماركة ((حتى)) .. (نورينا) واخده دكتوراه من جامعة ((كمبردج)) فى الاقتصاد .. يعنى الست عارفه هى بتقول ايه وبتتكلم فى تخصصها لا هى أفتت فى الدين ولا رفعت شعار (كله ماشى) زى ما بتوع ((حتى)) بيعملوا دلوقت .. الست دى عملت الشأى بلبن اللى بقولكم عليه وخلطت الاقتصاد فى السياسة ، وبصت للكوباية من بعيد وبعدين حطت عليها علامة إستفهام بتقول إيه هو المبرر الاخلاقى للرأسمالية علشان تبهدل المواطن وتطلع عين اللى خلفوه وتبيعه فى سوق الكانتو بتلاتة تعريفة ؟ .. وعلى مدار (٢٨٢)صفحة من كتابها (السيطرة الصامتة) بتحاول تجاوب على السؤال ده.

الشىء المهم فى العملية دي أن (نورينا) فى كتابها مش بتمسح بوخ لاحد .. ولا بتقول كله تمام .. ولا بتقول إن المواطن هو اللى حمار ومش فاهم الدنيا ماشية ازأى .. لكن (نورينا) ومع اول صفحات الكتاب بتقول بالفم الحياني ((يا جدعان الكتاب ده نصير للشعب ونصير للديمقراطية)) .. وحاولت أن تبين العلاقة بين السياسة والاقتصاد ووضحت ان الاقتصاد هو اللى بيتحكم فى السياسة .. والست نورينا -الله يسترها- بتوضح أن ممثليهم فى الانتخابات بيركعوا لرجال المال ومش بعيد كمان يرقصوا لهم عشرة بلدي .. ولفظ الرقص ده ذكرته (نورينا) على فكرة .. وبتوضح الست (نورينا) أن رجال المال مش بيدوا الفلوس دى كده لله وللوطن .. لكن شىء مقابل شىء .. وسياسة (شيلني واشيلك ..) فمثلا كليتون شال الضريبة من على البيرة مقابل تدعيم بعض برامجه بالمال .. يعنى الشعب يتكيف وتجار البيرة يكسبوا وكليتون يمشى حاله .. وكمان شوف دى يا معلم علشان تتعلم .. أمريكا وست ابوها

بريطانيا عملوا زمان نظام هباب اسمه (إيشلون) علشان يتجسسوا به على المانيا النازية .. وكان شغال كفاءة .. لكن بعد لما سقطت النازية فنظام (إيشلون) كده حيتجسس على مين! مش معقول يخراطوه للوز!

قالوا خلاص نشتغل فى الازرق .. وقلبوها شغل بلطجة .. وسلطوا (إيشلون) على الشركات الرأسمالية الكبرى وسرقوا منهم الصفقات التجارية لحساب الشركات الامريكية .. ومن غير دخول فى أرقام كثير من اللى صدعت (نورينا) بها دماغنا أقولك إن (إيشلون) الهباب ده تسبب للتجارة الالمانية فى خسائر وصلت لـ ١٠ بلايين دولار فى عام ٢٠٠٠ م .. فلك أنك تتصور الكوارث اللى عملها (إيشلون) .. وإذا كان الهباب إيشلون ده بيخبط فى شركات غيلان برده وحيثان كبيرة من حيثان السوق فالعملية كلها مش مهمة لنا .. بس فى الاخر كله على دماغ المواطن .. لانه فى نظام مهيب زى ده الاغنياء بيطلعوا ل فوق والفقراء نازلين لتحت لغاية ما حيخرموا باطن الارض من النزول.

وزى ما انت شايف كده فى نظام عالمي زى ده بتتحكم فيه الشركات الراسمالية كان لازم على رجال السياسة انهم يحطوا ايدهم فى ايد الغيلان دول .. والعملية فلتت أوى مبأش مجرد تمويل لحملاات انتخابية .. ده زى ما بتقول نورينا اصبح رجال الاعمال هم السياسيين غير المنتخبين والسفراء والدبلوماسيين غير الرسميين .. وعلشان تعرف ان الخيبة والوكسة مش خيبتنا احنا بس ولو أن خيبتهم هما السبب والاحد واحنا خيبتنا موردتش على حد لكن شوف مثلا إزاي رجال الاعمال بيلعبوا بالبيضة والحجر فى عالم رجال السياسة فيه عاملين زى البطة البلدى اللى لا بتحل ولا تربط .. وتديك (نورينا) مثال بالاعلامي الروسى بوريس بيرسوفيسكي اللى شارك فى اطلاق سراح ٥٠ رهينة من الشيشان .. ومن غير لا سحر ولا شعوذة .. ونجح فى اللى فشل غيره من السياسيين فى تحقيقه. فعالم زى ده من بتاع ((دعه يعمل دعه يمر)) يتحكم فيه رجال الاعمال فى كل شىء .. هل تتوقع مثلا فيه مكان للفقير! .. أو فيه مكان للأخلاق! .. دلوقت رجال الاعمال ورجال السياسية بأه زيتهم فى دقيقتهم .. وأنت يا غلبان لا معاك لا زيت ولا دقيق .. بس لازم تعرف انها مش سايبه واحنا كشعوب مش ساكتين فإحنا متمسكين بموقفنا فلن نتلولو .. ولن نتلحح .. ولن نتبجح!

## فليك مبتل مان .. وركب اريال !!

أصبح شىء عادي جدا لما تفتح أى جرنال يومي أو اسبوعى أنك تلاقى باب مشاكل القراء ، وتلاقى صحفى أو كاتب عمال يحل مشاكل القراء اللى بتتبعته ، وزمان كان فى عدد الاهرام الاسبوعى باب للراحل عبد الوهاب مطاوع رحمه الله ، وكنت أتابع الباب ده ، مش علشان اقرأ المشاكل بقدر ما كنت عاوز أتعلم من عبد الوهاب مطاوع وطريقة تفكيره وازاى بيحل مشاكل القراء بحكمة وبخبرة حياتية عالية جدا .. من بعد عبد الوهاب مطاوع متلاقيش حد ممكن يجاريه فى المجال ده ، وكل اللى بيحلوا مشاكل القراء دلوقت ولا يعرفوا فى البطيخ .. وتلاقى حلوههم عبارة عن كلام إنشاء زى مقالات البطيخ الموجودة فى الجرايد بالضبط .. فحلول ملهاش اساسا اى علاقة بالواقع .. ولا حتى ان الكاتب بيحط نفسه مكان صاحب المشكلة ، لكن هو شغال تهبس واى حاجه علشان يخلص الصفحة اللى مطلوبة منه وقع فى يدي كتاب اسمه (( أحرف وكلمات )) للكاتبة الصحفية / كريمة شاهين وهى كانت رئيس قسم النهضة بمجلة المرأة اللى بتصدر فى الكويت زى ما بتقول فى الكتاب ، المهم الكتاب نفسه عبارة عن مشاكل القراء اللى كانت بتحلها فى الجريدة ، جمعته وأصدرتها فى كتاب اللى هو ( أحرف وكلمات ) .. المهم ان ردود الاستاذة (كريمة شاهين) على القراء تحس أنها عايشة فى كوكب تاني ، او بتكلم بمثالية عالم سمس ، أو انها بترزع أى كلمتين والسلام علشان تنجز وقتها .. والكتاب مليان بحكاوى غريبة وردود اغرب من الاستاذة كريمة ، انا حكتفى بمشكلة احد القراء اللى بعته من سوء حظه للاستاذة كريمة ، وكانت بعنوان (( غراميات زوجتى )) ص ١١٥ من الكتاب ..

المهم نشوف الراجل ده باعت بيقول ايه عن مراته وحلخصلكم كلامه وحديكم منه زهرة

الزهرة ، الراجل بيقول الأنى :

((أنا متزوج من فتاة لها ماضى .. كل اصدقائى يعرفون ماضيها اللعين ويتغامزون على

ويتساءلون كيف تزوجتها؟ ..صرت اقتفى اثرها فى كل مكان مثل المباحث ..أكتشفت انها على

علاقة بستة رجال .. انا أعترف بكل ضعفى انى احبها ولا اطيق الحياة بدونها .. فهل أسأت

الاختيار وهل ما فعلته معها مجرد حماقة وسذاجه))



الفهرس

الصفحة	الموضوع
٤	كلمة على السريع
٥	حياتنا اللي بأة شبه نادي الزمالك
٧	الشباب المصري من شرائط الفيديو للسيدات
٨	المفتش كرومبو وقول ألو
١٢	إزاي تعرف إن اللي قدامك ده يهودي
١٣	السكة اللي موش حديد
١٥	إفتح هويس السلام النفسي
١٦	بيضاء .. ملحاء .. هيفاء
١٨	مأساة حلق شنب على موسى حلالة
١٩	معلش يا حبيتي بابا وماما موش موافقين
٢١	إلى كل البنات المتحنجات
٢٤	لو الحب أندله
٢٦	مبيعرفش ييوس
٢٨	الحوار الصريح بين مستكة والدكتورة نفوسة النفساوية
٣٤	يوميات واحد مدفوس فى أتوبيس الاضطراب الجنسي التحككي
٣٦	الجوانب السلبية فى الشخصية المصرية
٤٩	سرقوا الصندوق يا ابو لمعة
٥١	السلطانية لا تزال على رأسي
٥٦	ربنا بيعد عنك افلام أمينة رزق
٥٨	رغم ان زيتهم بأه خلاص فى دقيقتهم

٦٠	قالها المتنبي ورددها عبد الفتاح القصري
٦٢	لو الهرم الاكبر إتسرق
٦٥	شبيك لبيك إمشى على دماغك وارفع لفوق رجليك
٦٨	سيري يا نورماندي
٧٠	لما أحب أكلم شعب مصر
٧٢	و حد قالك فى الشارع إنت ديباجوجي
٧٤	حكايات البنجان عن اللى بيمشى عريان
٧٧	يا مركبي سيري فى طريقك
٧٩	الحب من طرف ثالث
٨١	الضرب فى المدارس
٨٣	غلبت اصالح فى روجي
٨٥	يا من تطلب المدد من الميتين
٨٧	دماغك متوافقة مع مين؟!
٨٨	لولاقيت حد فى الشارع شعره منكوش واعور
٩٠	رغم ان زيتهم بأه خلاص فى دقيقتهم
٩٢	خليك جنتل مان وركب اريال